

MESYUARAT PERTAMA, PENGGAL KEEMPAT
PARLIMEN KEEMPAT BELAS
2021

HARI SELASA : 12 OKTOBER 2021

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 63)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN MORDI BIMOL
[MAS GADING]**

TARIKH : 12 OKTOBER 2021 (SELASA)

SOALAN :

Tuan Mordi Bimol [Mas Gading] minta **PERDANA MENTERI** menyatakan adakah Kerajaan akan memberikan peruntukan sama rata kepada semua Ahli Parlimen bagi memastikan setiap kawasan serta rakyat dapat menerima hak mereka secara adil.

JAWAPAN

**YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS TUGAS KHAS)**

Tuan Yang di-Pertua,

1. Peruntukan Khas YAB Perdana Menteri untuk kawasan Parlimen sebenarnya hanya sebagai penambah dan pelengkap kepada peruntukan yang disediakan oleh Kerajaan di bawah Rancangan Malaysia Lima Tahun. Penyediaan Peruntukan Kawasan Parlimen kepada Ahli-Ahli Parlimen Kerajaan dan Pembangkang adalah mengikut dasar sedia ada dan bergantung kepada kemampuan dan kedudukan semasa kewangan Kerajaan.
2. Untuk makluman Ahli-ahli Yang Berhormat, YAB Perdana Menteri sangat komited untuk melaksanakan agenda transformasi Parlimen sepertimana termaktub di dalam *Confidence And Supply Agreement* (CSA). Sehubungan dengan itu, bagi baki 4 bulan tahun ini iaitu mulai September hingga Disember 2021, YAB Perdana Menteri telah bersetuju untuk memberikan peruntukan kepada semua Ahli Parlimen tidak kira di pihak Kerajaan mahupun di pihak Pembangkang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 12 OKTOBER 2021 (SELASA)

SOALAN

Dato' Mohd. Nizar bin Haji Zakaria [Parit] minta **PERDANA MENTERI** menyatakan :-

(a) berapa jumlah individu yang telah diisytiharkan muflis sepanjang tempoh pandemik COVID-19 melanda negara; dan

(b) apakah usaha yang telah dilaksanakan oleh Kementerian bagi membantu individu muflis kesan daripada pandemik COVID-19.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

(a) berapa jumlah individu yang telah diisytiharkan muflis sepanjang tempoh pandemik COVID-19 melanda negara

Jumlah kes kebangkrapan mengikut bilangan individu yang muflis serta pecahan mengikut negeri dari Mac 2020 hingga ke Julai 2021 adalah seperti di **Lampiran 1**. Jumlah keseluruhan ialah sebanyak **10,317 kes**.

(b) apakah usaha yang telah dilaksanakan oleh Kementerian bagi membantu individu muflis kesan daripada pandemik COVID-19

Pada ketika ini, bagi membantu mengurangkan kadar kebangkrapan, Jabatan Insolvensi Malaysia (Mdl) telah membuat pengubahsuaian melalui Bahagian VII - Pengubahsuaian Kepada Akta 360 di dalam Akta Langkah-Langkah Sementara bagi Mengurangkan Kesan Penyakit Koronavirus 2019 (COVID-19) 2020 [*Akta 829*] yang telah diluluskan oleh Parlimen dan berkuat kuasa pada 23 Oktober 2020. Pengubahsuaian yang dibuat ialah terhadap nilai had minima keberhutangan yang ditetapkan kepada RM100,000 dan akan berkuat kuasa sehingga 31 Ogos 2021.

Selanjutnya, Mdl juga turut meminda peruntukan perenggan 5(1)(a) Akta Insolvensi 1967 [*Akta 360*] melalui Akta Insolvensi (Pindaan) 2020 [*Akta A1624*] yang telah diwartakan pada 22 Oktober 2020 dan berkuat kuasa sejak 1 September 2021. Pindaan ini juga adalah untuk menetapkan nilai had minima keberhutangan kepada RM100,000.

SOALAN NO : 13

Pindaan-pindaan tersebut adalah salah satu langkah kontigensi Kerajaan dalam menangani kesan-kesan akibat dari penularan COVID-19 dan PKP yang telah memberi impak besar kepada rakyat dari pelbagai aspek kehidupan.

Tuan Yang di-Pertua,

Selain itu, Mdl dalam usaha berterusan untuk mengurangkan kadar kebangkrapan sentiasa memberi kesedaran kepada masyarakat tentang risiko atau kesan daripada perintah kebangkrapan. Kesedaran ini dapat diterap melalui pendidikan dan pendekatan perbelanjaan yang berhemah.

Mdl telah melaksanakan pelbagai program bagi mewujudkan kesedaran masyarakat tentang isu muflis dengan melaksanakan program bersama masyarakat (*outreach programme*) serta Mdl Prihatin. Program ini bertujuan untuk menyampaikan maklumat, memberikan pendidikan dan mewujudkan kesedaran kepada orang awam termasuklah taklimat dan ceramah kesedaran mengenai isu kebangkrapan kepada agensi-agensi awam, swasta, orang awam dan pelajar-pelajar institusi pengajian tinggi awam dan swasta bagi menerangkan kesan dan akibat daripada perintah kebangkrapan supaya masalah ini dapat ditangani di peringkat awal lagi.

Selain itu, Kerajaan juga melalui Agensi Kaunseling dan Pengurusan Kredit (AKPK) iaitu sebuah agensi di bawah Bank Negara Malaysia telah mengadakan program-program untuk memberi kesedaran tentang isu kebangkrapan. Program ini juga melibatkan perancangan kewangan kepada semua golongan supaya dapat menangani masalah pengurusan kewangan di peringkat pra kebangkrapan. Pengurusan kewangan yang berhemah akan menjamin kedudukan kewangan di tahap yang terbaik. Melalui program ini akan dapat membantu masyarakat untuk berbelanja secara berhemah dan bijak dalam pengurusan kewangan bagi mengelakkan perintah kebangkrapan.

Sekian, terima kasih.

SOALAN NO : 13

LAMPIRAN 1

JUMLAH KES KEBANKRAPAN YANG DIDAFTARKAN PADA MAC 2020 - JUL 2021

CAWANGAN	TAHUN 2020										TAHUN 2021							JUMLAH
	Mac	Apr	Mei	Jun	Jul	Ogos	Sept	Okt	Nov	Dis	Jan	Feb	Mac	Apr	Mei	Jun	Jul	
WILAYAH PERSEKUTUAN	39	0	0	68	84	117	183	108	4	56	20	51	128	103	109	91	127	1,288
SELANGOR	10	0	0	150	267	285	255	174	26	315	96	128	367	378	102	0	2	2,555
JOHOR BAHRU	57	0	7	36	44	0	69	117	62	37	19	40	27	125	97	3	52	792
PERAK	40	0	14	33	63	46	60	81	29	14	33	20	27	112	38	15	3	628
PULAU PINANG	10	0	32	33	21	21	71	35	63	28	32	6	26	44	62	0	4	488
KEDAH	24	0	5	26	47	52	2	61	54	10	30	22	51	38	16	5	34	477
MUAR	15	0	0	24	22	26	45	38	0	32	0	1	24	36	3	0	0	266
SABAH	42	0	6	74	88	87	85	11	0	28	50	52	39	35	25	1	0	623
KELANTAN	12	0	5	2	17	40	61	46	30	34	59	14	46	33	0	0	20	419
MELAKA	32	0	0	9	21	33	51	17	13	9	5	19	30	26	13	5	0	283
NEGERI SEMBILAN	47	0	28	22	26	3	96	48	28	1	9	4	20	57	69	0	23	481
TEMERLOH	9	0	9	16	17	22	27	32	19	20	7	4	20	14	5	0	0	221
PAHANG	21	0	0	19	25	18	11	29	22	9	11	18	35	16	0	0	0	234
SARAWAK	12	0	1	36	39	22	31	27	11	11	11	25	19	22	11	4	6	288
TERENGGANU	21	0	0	6	15	55	54	51	18	31	28	0	35	24	3	0	4	345
MIRI	14	0	5	20	25	13	23	23	13	17	10	10	17	8	8	4	2	212
SIBU	12	0	0	11	19	15	9	12	11	4	4	2	10	7	6	0	1	123
TAIPING	6	0	6	19	26	24	25	18	12	26	6	12	14	2	3	0	0	199
TAWAU	5	0	23	16	34	18	33	0	0	21	13	10	14	0	26	0	0	213
SANDAKAN	8	0	5	18	17	13	25	0	0	2	8	7	7	7	0	1	11	129
PERLIS	2	0	0	3	2	5	6	5	4	6	8	0	4	3	5	0	0	53
JUMLAH	438	0	146	641	919	915	1,222	933	419	711	459	445	960	1,090	601	129	289	10,317

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB DR. KELVIN YII LEE WUEN
(BANDAR KUCHING)**

TARIKH : 12 OKTOBER 2021 (SELASA)

SOALAN :

DR. KELVIN YII LEE WUEN (BANDAR KUCHING) minta **PERDANA MENTERI** menyatakan perancangan Kerajaan baru untuk menangani pandemik COVID-19 dan kesannya terhadap sosioekonomi, kesihatan mental rakyat dan pendekatan baru setelah pendekatan lalu telah menunjukkan kegagalan untuk menangani kesan pandemik ini.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Di Pertua,

1. Kerajaan sentiasa berusaha untuk mengimbangi antara keperluan kesihatan awam, pemulihan semula ekonomi dan kesihatan mental rakyat dalam tempoh krisis pandemik ini.
2. Antara pendekatan yang telah diambil adalah mempercepatkan kadar vaksinasi penduduk Malaysia dengan sasaran mencapai imuniti kelompok pada penghujung Oktober 2021, melaksanakan Pelan Pemulihan Negara (PPN), pengumuman Pakej Perlindungan Rakyat dan Pemulihan Ekonomi (PEMULIH), melaksanakan Program Subsidi Upah serta pelbagai inisiatif-inisiatif lain bagi membantu dalam pemulihan ekonomi negara.
3. Adalah dijangka kesan daripada perancangan ini, rantaian ekonomi akan diaktifkan sekaligus menyumbang kepada jaminan pasaran kerja, mengurangkan risiko pengangguran, meningkatkan dan memulihkan keyakinan pelabur dan pengeluar sekaligus menjadi faktor penggalak kepada sektor lain. Pelan pemulihan ekonomi ini juga dilihat akan dapat menjana pertumbuhan ekonomi negara dan memperbaiki kehidupan rakyat secara menyeluruh.
4. Pada masa yang sama, Kerajaan sedang bersedia dalam mempersiapkan rakyat untuk berhadapan situasi pandemik COVID-19 sebagai endemik yang mana virus ini telahpun berada dalam komuniti dan masyarakat perlu meneruskan kehidupan seharian dengan pematuhan SOP. Dengan peralihan fasa pandemik ke endemik, adalah dijangka keadaan sosio-ekonomi dan kesihatan mental rakyat juga akan bertambah baik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS (2021)**

PERTANYAAN : LISAN

**DARIPADA : YB TUAN NIK MOHD ABDUH BIN NIK ABDUL
AZIZ [BACHOK]**

TARIKH : 12 OKTOBER 2021 [SELASA]

SOALAN

Minta **PERDANA MENTERI** menyatakan status elemen-elemen utama yang menjadi penumpuan dalam penggubalan Akta Kawalan dan Sekatan Pengembangan Doktrin atau Kepercayaan Agama dalam kalangan orang Islam.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Fasal (1) Perkara 11 Perlembagaan Persekutuan memperuntukkan bahawa tiap-tiap orang berhak menganuti dan mengamalkan agamanya dan, tertakluk kepada Fasal (4), mengembangkannya. Fasal (4) Perkara 11 Perlembagaan Persekutuan selanjutnya pula, antara lainnya, memperuntukkan bahawa undang-undang persekutuan boleh mengawal atau menyekat pengembangan apa-apa doktrin atau kepercayaan agama dalam kalangan orang yang menganut agama Islam.

2. Bagi tujuan mengawal atau menyekat pengembangan apa-apa doktrin atau kepercayaan agama dalam kalangan orang yang menganut agama Islam seperti yang diperuntukkan di bawah Fasal (4) Perkara 11 Perlembagaan Persekutuan, Kerajaan berhasrat untuk menggubal Rang Undang-Undang Kawalan dan Sekatan Pengembangan Doktrin atau Kepercayaan Agama (Wilayah-Wilayah Persekutuan) 2021 (“RUU Kawalan”). RUU Kawalan ini bukan bertujuan untuk menyekat kebebasan beragama di kalangan penganut selain penganut beragama Islam. Hak orang bukan Islam untuk menganut dan mengamalkan agamanya adalah dijamin di bawah Fasal (1) Perkara 11 Perlembagaan Persekutuan. Sebaliknya, RUU Kawalan ini adalah bertujuan untuk menyekat pengembangan apa-apa doktrin atau kepercayaan agama dalam kalangan orang yang menganut agama Islam. Dalam hal ini, undang-undang seumpama ini bukan merupakan undang-undang baharu. Sebaliknya ia telah wujud di kebanyakan negeri.

3. Bagi memastikan RUU Kawalan yang digubal tersebut selari dan selaras dengan punca kuasa yang telah ditetapkan dalam Perlembagaan Persekutuan dan seterusnya dapat dikuatkuasakan dengan berkesan, antara elemen-elemen utama yang perlu diambil kira ialah seperti yang berikut:

- (i) kebebasan untuk menganuti dan mengamalkan agama yang diperuntukkan di bawah Fasal (1) Perkara 11 Perlembagaan Persekutuan;
- (ii) skop kuasa yang diperuntukkan di bawah Fasal (4) Perkara 11 Perlembagaan Persekutuan;
- (iii) perbuatan “pengembangan” yang dikategorikan sebagai kesalahan berkaitan mengembangkan apa-apa doktrin atau kepercayaan agama di kalangan orang yang menganuti agama Islam perlu dinyatakan secara jelas bagi memastikan ia selaras dengan Fasal (4) Perkara 11 Perlembagaan Persekutuan. Selain itu, ia juga bertujuan memastikan tidak timbul pertikaian oleh pihak-pihak tertentu apabila RUU Kawalan tersebut dikuatkuasakan kelak;

- (iv) pihak yang bertanggungjawab untuk menguatkuasakan peruntukan dalam RUU Kawalan tersebut juga perlu diteliti memandangkan kesalahan-kesalahan yang diperuntukkan di bawah RUU Kawalan tersebut tidak terhad kepada kesalahan yang dilakukan oleh orang Islam semata-mata; dan
- (v) penentuan kadar hukuman bagi kesalahan yang diperuntukkan dalam RUU Kawalan juga perlu diteliti bagi memastikan ia setimpal dengan kesalahan yang dilakukan.

4. Untuk makluman Ahli Yang Berhormat, sepanjang tahun 2020 dan 2021 Kerajaan melalui Jawatankuasa Teknikal Undang-Undang Syarak dan Sivil ("Jawatankuasa Teknikal") yang ditubuhkan oleh Majlis Raja-Raja di bawah Majlis Kebangsaan Bagi Hal Ehwal Ugama Islam (MKI) telah mengadakan beberapa siri mesyuarat bagi membincangkan RUU Kawalan. Selain itu, Jawatankuasa Teknikal turut menubuhkan sebuah jawatankuasa kecil khusus bagi meneliti secara lebih mendalam RUU Kawalan tersebut dan seterusnya mencadangkan penambahbaikan terhadap RUU Kawalan tersebut bagi memastikan ia selaras dengan Perlembagaan Persekutuan.

5. Setelah RUU Kawalan dimuktamadkan kelak, RUU Kawalan tersebut akan dibentangkan kepada negeri-negeri dalam Persidangan Penyelarasan Undang-Undang Syarak dan Sivil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATO' WIRA HAJI AMIRUDDIN BIN
HAJI HAMZAH [KUBANG PASU]**

TARIKH : 12 OKTOBER 2021 (SELASA)

SOALAN

DATO' WIRA HAJI AMIRUDDIN BIN HAJI HAMZAH minta **MENTERI KESIHATAN** menyatakan langkah Kerajaan dalam mengutamakan vaksinasi kepada ibu hamil kerana nisbah kes ibu hamil dijangkiti COVID-19 yang menerima rawatan rapi berbanding jumlah pesakit COVID-19 kritikal ialah 1 dalam 20. Nisbah ini jauh lebih tinggi berbanding nisbah jangkitan ibu hamil dalam populasi umum iaitu 1 dalam 220.

JAWAPAN

Tuan Yang di-Pertua,

1. Kementerian Kesihatan memandang serius terhadap penularan jangkitan COVID-19 dalam kalangan ibu hamil, memandang golongan ini lebih berisiko untuk mendapat jangkitan COVID-19 yang teruk dan memerlukan kemasukan ke Unit Rawatan Rapi (ICU) serta bantuan pernafasan (*invasive ventilation*) berbanding wanita yang tidak hamil. Jangkitan COVID-19 tahap yang lebih teruk kerap berlaku pada trimester kedua dan ketiga.

2. Sehubungan itu, pada bulan Jun 2021, Kerajaan telah mengumumkan bahawa ibu hamil diberi keutamaan dalam pemberian vaksin COVID-19 bagi mencegah golongan ini mendapat jangkitan COVID-19 yang teruk. Keutamaan yang diberikan adalah seperti berikut:-

SOALAN NO : 16

- (i) Ibu hamil akan diberi tarikh janji temu vaksinasi lebih awal berbanding individu lain yang tidak hamil, sekalipun ibu hamil berkenaan baharu sahaja mendaftar untuk mendapatkan janji temu vaksin. Ibu hamil boleh mendaftar mendapatkan janji temu vaksin sama ada menggunakan aplikasi MySejahtera atau melalui klinik kesihatan KKM. Jika menggunakan aplikasi MySejahtera, ibu hamil perlu mengemaskini status kehamilan mereka bagi membolehkan tarikh janji temu didahulukan kepada mereka.
 - (ii) Berdasarkan garis panduan pemberian vaksin COVID-19 bagi ibu hamil oleh Kementerian Kesihatan, ibu hamil disarankan untuk menerima vaksin selepas 12 minggu kehamilan. Walau bagaimanapun, ibu diberi pilihan untuk menerima vaksin pada mana-mana tempoh kehamilan. Mereka boleh berbuat demikian dengan mengunjungi klinik kesihatan atau hospital dan penerangan lanjut akan diberikan.
 - (iii) Setiap ibu hamil yang hadir ke klinik untuk pemeriksaan rutin kehamilan akan diterangkan mengenai kepentingan vaksin COVID-19 bagi ibu hamil dan akan dibantu untuk mendaftar serta mendapat janji temu vaksin COVID-19. Proses ini bermula pada sesi pertama pemeriksaan kehamilan dan akan diulang pada sesi lawatan pemeriksaan seterusnya jika ibu masih belum bersetuju untuk mendaftar menerima vaksin.
 - (iv) Di beberapa Pusat Pemberian Vaksin (PPV), lorong khas disediakan bagi ibu hamil bagi mempercepatkan pemberian vaksin kepada mereka.
3. KKM sentiasa berusaha untuk menyemak dan mengemas kini garis panduan pemberian vaksin COVID-19 kepada ibu hamil dari masa ke masa berdasarkan bukti saintifik yang terkini untuk menambah baik program pemberian vaksin COVID-19 kepada golongan ini. Hasrat KKM ialah untuk memberikan vaksinasi kepada ibu hamil seawal mungkin bagi memberikan perlindungan yang optimum. Walau bagaimanapun, perkara ini mestilah selaras dengan saranan dan bukti saintifik yang ada. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB DATO' SERI TIONG KING SING (BINTULU)

TARIKH : 12 OKTOBER 2021 (SELASA)

SOALAN

DATO' SERI TIONG KING SING [BINTULU] minta **MENTERI KERJA RAYA** menyatakan:

(a) apakah perancangan Kementerian untuk memastikan sistem pengairan di sepanjang pembinaan projek Lebuh Raya Pan Borneo terutamanya di kawasan Bintulu dibaiki dan ditambah baik mengikut keadaan semasa memandangkan seberapa lokasi sering dilanda banjir kilat akibat sistem pengairan yang sangat teruk; dan

(b) apakah tindakan tegas yang diambil Kementerian terhadap kontraktor yang gagal mematuhi piawaian pembinaan dan penyelenggaraan jalan-jalan utama yang terlibat dalam Lebuh Raya Pan Borneo

JAWAPAN

Tuan Yang Di-Pertua,

Untuk makluman Ahli Yang Berhormat, berhubung aduan beberapa lokasi sering dilanda banjir kilat berhampiran kawasan pembinaan Projek Lebuhraya Pan Borneo Sarawak di Bintulu, Kementerian Kerja Raya telah mengarahkan JKR Sarawak dan Kontraktor Pakej Kerja untuk mengambil tindakan pembaikan segera khususnya menambahbaik sistem pengairan di kawasan-kawasan cenderung banjir.

Untuk makluman Ahli Yang Berhormat, prosedur-prosedur keselamatan seperti berikut diguna pakai bagi memastikan keselamatan pengguna jalan raya semasa pelaksanaan Projek Lebuhraya Pan Borneo Sarawak:

- i) Prosedur Pelan Pengurusan Trafik (*Traffic Management Plan* – TMP) di tapak bina sepanjang pembinaan jalan raya, berpandukan kepada Piawaian Arahan Teknik JKR;
- ii) Akta Kilang Dan Jentera 1967, Peraturan (*Building Operation and Works of Engineering Construction* - BOWEC) 1986;
- iii) Akta Keselamatan dan Kesihatan Pekerjaan 1994; dan
- iv) Garis Panduan Keselamatan dan Kesihatan Pekerjaan Awam di Tapak Bina Tahun 2007.

Jika terdapat kegagalan pihak kontraktor untuk mematuhi prosedur-prosedur keselamatan yang dinyatakan di atas, Arahan Pemberhentian Kerja (*Stop Work Order*) akan dikeluarkan kepada pihak kontraktor terlibat. Kerja-kerja pembinaan hanya boleh diteruskan setelah penambahbaikan dilaksanakan oleh kontraktor berdasarkan kepada Notis Penambahbaikan (*Corrective Action Request* - CAR) oleh Pegawai Penguasa (Pengarah JKR Sarawak).

Selain daripada prosedur-prosedur keselamatan tersebut, pemantauan berterusan turut dilakukan oleh Kementerian dan JKR Sarawak selaku Pegawai Penguasa bagi memastikan keselamatan dan keselesaan pengguna jalan raya khususnya di sepanjang kawasan pembinaan Projek Lebuhraya Pan Borneo Sarawak. Ini termasuklah pemeriksaan mengejut dan audit keselamatan jalanraya oleh pihak ketiga, iaitu Ibu Pejabat JKR Malaysia yang diadakan mengikut keperluan dan aduan sekiranya ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB TUAN AKMAL NASRULLAH BIN MOHD.
NASIR [JOHOR BAHRU]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan peratusan terkini bilangan pekerja warga asing yang telah divaksin bagi mengekang penularan wabak COVID-19 dan pembentukan kluster-kluster baru terutamanya dalam sektor industri perkilangan yang memiliki tenaga buruh asing yang tinggi.

JAWAPAN

Tuan Yang di-Pertua,

Untuk makluman Ahli Yang Berhormat,

Berdasarkan kepada statistik pemberian vaksin COVID-19 (11 Oktober 2021) kepada bukan warganegara, seramai 2.96 juta orang dewasa telah menerima sekurang-kurangnya satu dos vaksin manakala 2.23 juta orang dewasa telah menerima lengkap dos.

Data penerima vaksin bukan warganegara ini juga merangkumi pelaksanaan vaksinasi kepada pekerja di bawah PPV Industri termasuk

pekerja asing. Sehingga tempoh yang sama, melalui PPV Industri, seramai 1,004,798 pekerja telah menerima dos pertama vaksin dan 946,256 menerima dos lengkap vaksin.

Menurut data daripada Kementerian Kesihatan, sehingga 10 Oktober 2021, sebanyak 1,528 kluster perkilangan dilaporkan melibatkan 183,535 kes positif COVID-19. Daripada jumlah tersebut, 253 kluster perkilangan masih aktif dan di bawah tempoh pemantauan wabak.

Untuk makluman Yang Berhormat, PPV Industri telah memainkan peranan yang sangat penting dalam mempercepatkan pemberian vaksinasi kepada pekerja tanpa mengganggu pelaksanaan vaksinasi bagi rakyat umum di Pusat Pemberian Vaksin (PPV) Awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AHMAD JOHNNIE BIN ZAWAWI
(IGAN)**

TARIKH : 12 OKTOBER 2021 (SELASA)

SOALAN

TUAN AHMAD JOHNNIE BIN ZAWAWI [IGAN] minta **MENTERI KERJA RAYA** menyatakan sejauh manakah penularan COVID-19 memberi impak terhadap pembinaan Lebuhraya Pan Borneo.

JAWAPAN

Tuan Yang Di-Pertua,

Sebagaimana Ahli Yang Berhormat sedia maklum, projek Lebuhraya Pan Borneo Sarawak kini sedang dilaksanakan secara konvensional dengan kerjasama JKR Sarawak susulan daripada penamatan Perjanjian Rakan Pelaksana Projek (Project Delivery Partner Agreement – PDPA). Sehingga bulan September 2021, status kemajuan terkini adalah 71% bagi projek Lebuhraya Pan Borneo Sarawak dari Telok Melano ke Miri dengan jangkaan siap sepenuhnya pada September 2022. Sama seperti projek-projek Kerajaan lain, wabak Covid-19 telah memberi kesan ke atas kemajuan kerja dan kos pembinaan Projek Lebuhraya Pan Borneo Sarawak.

Sehubungan itu pelbagai *mitigation plan* sedang dilaksanakan antara lainnya penyelarasan semula jadual pembinaan dan Lanjutan Masa (Extension Of Time - EOT) selama 84 hari bagi memastikan kelancaran dan kelangsungan projek Lebuhraya Pan Borneo Sarawak sebagai pemangkin pembangunan sektor sosio-ekonomi, perindustrian serta pelaburan di sepanjang jajaran projek tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KE EMPAT BELAS**

PERTANYAAN : JAWAB LISAN

DARIPADA : TENGKU ZULPURI BIN RAJA PUJI [RAUB]

TARIKH : 12 OKTOBER 2021 [SELASA]

SOALAN

Tengku Zulpuri bin Raja Puji [Raub] minta **MENTERI ALAM SEKITAR DAN AIR** menyatakan pada awal Januari 2021, kawasan Parlimen Raub di landa banjir besar beberapa kawasan kampung dan pinggiran bandar terlibat, ada yang menyatakan banjir ini sama seperti tahun 1971. Apakah usaha Kerajaan pusat melalui JPS dan agensi lain termasuk Kerajaan Negeri Pahang untuk mengatasi masalah ini supaya ianya dapat mengurangkan risiko kerosakan dan kemusnahan harta benda dan nyawa.

JAWAPAN

Tuan Yang Di-Pertua,

1. Kejadian banjir yang berlaku pada awal Januari 2021 di kawasan Parlimen Raub melibatkan jajaran Sungai Dong yang merupakan sub-lembangan kepada Sungai Pahang.
2. Bagi mengatasi masalah banjir di sekitar jajaran Sungai Dong di kawasan Parlimen Raub, Kementerian Alam Sekitar dan Air (KASA) melalui Jabatan Pengairan dan Saliran (JPS) telah memohon peruntukan sebanyak RM75 juta bagi melaksanakan projek Rancangan Tebatan Banjir (RTB) Sungai Dong, Daerah Raub, Pahang Darul Makmur di bawah Rancangan Malaysia Kedua Belas (RMKe-12).
3. Antara skop projek yang akan dilaksanakan adalah perkhidmatan perunding bagi melaksanakan kajian rekabentuk terperinci, pengambilan tanah, menaiktaraf Sungai Dong, membina struktur penahan banjir dan struktur kawalan hakisan tebing sungai, kolam takungan banjir dan juga sistem rumah pam.
4. Di bawah program PEMERKASA, sebanyak RM1.03 juta telah diperuntukkan bagi Kerja-Kerja Pemuliharaan Sungai Bagi Mengurangkan Risiko Banjir (PEMERKASA) di Daerah Raub yang melibatkan 19 projek.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN TUAN WONG CHEN (SUBANG)

TARIKH : 12 OKTOBER 2021 (SELASA)

SOALAN

TUAN WONG CHEN minta **PERDANA MENTERI** menyatakan adakah Kerajaan berniat untuk membentuk sebuah jawatankuasa pilihan bersama yang terdiri daripada Ahli-Ahli Parlimen daripada pihak Kerajaan dan pembangkang untuk memantau pelaksanaan Pelan Pemulihan Negara.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Seperti mana Yang Berhormat sedia maklum, kini terdapat 9 Jawatankuasa Pilihan Khas iaitu seperti berikut:

- i. Jawatankuasa Pilihan Khas Kebebasan Asasi dan Hak-Hak di Bawah Perlembagaan
- ii. Jawatankuasa Pilihan Khas Kewangan Dan Ekonomi
- iii. Jawatankuasa Pilihan Khas Keselamatan
- iv. Jawatankuasa Pilihan Khas Bagi Agensi-Agensi Di Bawah Jabatan Perdana Menteri

SOALAN NO : 21

- v. Jawatankuasa Pilihan Khas Pertanian Dan Perdagangan Dalam Negeri
- vi. Jawatankuasa Pilihan Khas Pembangunan Infrastruktur
- vii. Jawatankuasa Pilihan Khas Pendidikan
- viii. Jawatankuasa Pilihan Khas Hal Ehwal Wanita Dan Kanak-Kanak Dan Pembangunan Sosial
- ix. Jawatankuasa Pilihan Khas Kesihatan, Sains dan Inovasi

Keahlian Jawatankuasa-Jawatankuasa tersebut terdiri daripada Ahli Parlimen Kerajaan dan Ahli Parlimen Pembangkang. Oleh itu, Jawatankuasa yang berkaitan seperti di atas boleh meneliti perkara yang dibangkitkan oleh Ahli Yang Berhormat.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

**TARIKH : 12 OKTOBER 2021
(SELASA)**

SOALAN

Minta **MENTERI PERTAHANAN** menyatakan status terkini pengumuman khidmat wajib minima 21 tahun bagi membolehkan semua veteran layak mendapat pencen.

JAWAPAN

Tuan Yang di-Pertua,

Dasar semasa Angkatan Tentera Malaysia (ATM) bagi membolehkan anggota Lain-Lain Pangkat ATM menerima pencen adalah setelah berkhidmat 21 tahun. Selain itu, mereka juga dibenarkan untuk menamatkan perkhidmatan lebih awal iaitu pada tahun ke-12, 15 dan 18.

Walau bagaimanapun, ATM kini sedang melaksanakan kajian bagi membolehkan anggota yang menamatkan perkhidmatan pada tahun ke-12, 15 dan 18 turut diberi pencen setelah mencapai tempoh 21 tahun dari tarikh mereka memasuki perkhidmatan.

Cadangan ini merupakan pendekatan serampang dua mata dengan mengambilkira keperluan aturgerak ATM dan pada masa yang sama turut mementingkan kebajikan anggota yang perlu bersara lebih awal dari 21 tahun.

Kajian ini akan dipanjangkan kepada Jabatan Perkhidmatan Awam (JPA) untuk tindakan selanjutnya. Sehingga kajian ini selesai dan diputuskan oleh pihak JPA, skim pencen ATM yang sedia ada ini akan terus digunakan oleh ATM.

Terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB. PUAN ISNARAISSAH MUNIRAH
BINTI MAJILIS @ FARKHARUDY
[KOTA BELUD]**

TARIKH : 12 OKTOBER 2021 (SELASA)

SOALAN

PUAN ISNARAISSAH MUNIRAH BINTI MAJILIS @ FARKHARUDY minta **MENTERI KESIHATAN** menyatakan justifikasi pelaksanaan vaksinasi buat anak- anak berumur dalam lingkungan 12 hingga 18 tahun, dimana tidak mengikut piawaian amalan vaksinasi di Amerika Syarikat dan United Kingdom seperti yang disebut oleh Menteri sebelum ini.

JAWAPAN

Tuan Yang di-Pertua,

1. Justifikasi pemberian vaksin kepada remaja berumur 12-17 tahun adalah:

- (i) statistik terkini menunjukkan trend peningkatan jangkitan COVID-19 dalam kalangan kanak-kanak di negara ini adalah amat membimbangkan. Selain itu, terdapat peningkatan kes kematian direkodkan akibat COVID-19 sejak Januari 2021 sehingga 19 September 2021 iaitu sebanyak 67 kematian berbanding enam (6) kematian pada 2020;

- (ii) golongan ini juga berkemungkinan untuk mendapat jangkitan COVID-19 yang serius/teruk terutamanya dalam kalangan remaja yang mempunyai masalah kesihatan yang lain (komorbiditi). Mereka juga boleh mengalami kondisi kesihatan yang serius yang berkait dengan COVID-19 yang dikenali sebagai “Multisystem Inflammatory Syndrome in Children (MIS-C)”. Selain itu, remaja juga berisiko menghadapi masalah kesihatan jangka panjang *Long-COVID-19* sepertimana orang dewasa;
- (iii) mereka boleh menjangkitkan COVID-19 kepada orang-orang lain. Vaksinasi akan memberi perlindungan kepada mereka dan mengurangkan kemungkinan jangkitan berlaku kepada orang-orang lain, termasuk ahli-ahli keluarga yang berisiko tinggi seperti ahli keluarga yang tua atau individu-individu lemah daya tahan imun; dan
- (iv) vaksinasi akan membolehkan mereka kembali menjalani kehidupan normal dengan lebih selamat seperti pergi ke sekolah, bersukan, berinteraksi dengan keluarga serta rakan dan mengembara.

2. Pada masa ini, vaksin Pfizer-BioNTech (Comirnaty) adalah vaksin COVID-19 yang telah diluluskan dan disarankan untuk remaja berumur 12-17 tahun di Malaysia. Tidak terdapat perbezaan dari segi kapasiti dos dan mereka boleh menerima dua (2) dos yang sama seperti yang disarankan kepada orang dewasa. Berdasarkan data kajian klinikal dan data dari *Real World* menunjukkan vaksin ini adalah selamat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : Y.B. DATUK ROZMAN BIN ISLI
[LABUAN]**

TARIKH : 12 OKTOBER 2021 (SELASA)

SOALAN

Datuk Rozman Bin Isli [Labuan] minta **MENTERI KANAN
PERDAGANGAN ANTARABANGSA DAN INDUSTRI** menyatakan bagi
tempoh Mac 2020 hingga kini :-

- (a) berapa jumlah pelaburan domestik dan pelaburan langsung asing mengikut kategori pelaburan dan negeri yang terlibat; dan
- (b) jumlah pelabur yang keluar atau menamatkan pelaburan ke Malaysia bagi tempoh yang sama.

JAWAPAN

Tuan Yang di-Pertua,

Bagi tempoh Mac 2020 hingga Jun 2021, jumlah keseluruhan pelaburan yang diluluskan dalam sektor perkilangan ialah sebanyak RM151.1 bilion. Pelaburan ini melibatkan 1,270 projek dan dijangka akan menjana sejumlah 102,729 peluang pekerjaan baharu. Pelaburan domestik menyumbang sebanyak RM42.2 atau 27.9% daripada jumlah pelaburan yang diluluskan, manakala pelaburan asing menyumbang sebanyak RM108.9 bilion atau 72.1%.

Bagi kelulusan projek mengikut negeri, lima (5) buah negeri utama, iaitu Kedah, Selangor, Sarawak, Sabah dan Pulau Pinang menyumbang sebanyak RM113.4 bilion (75.0%) daripada jumlah pelaburan dalam sektor perkilangan yang diluluskan. Kedah merupakan negeri yang menerima jumlah pelaburan tertinggi dengan jumlah pelaburan sebanyak RM46.0 bilion (30.4%), diikuti Selangor dengan RM21.7 bilion (14.4%), Sarawak dengan RM16.3 bilion (10.8%), Sabah dengan RM16.3 bilion (10.8%) dan Pulau Pinang dengan RM13.0 bilion (8.6%).

Negeri utama yang menerima pelaburan asing tertinggi adalah Kedah dengan RM44.0 bilion (40.4%), diikuti Sarawak dengan RM15.8 bilion (14.5%), Selangor dengan RM11.1 bilion (10.2%), Pulau Pinang dengan RM8.9 bilion (8.2%) dan Perak dengan RM4.7 bilion (4.3%).

Manakala bagi pelaburan domestik, negeri-negeri yang mencatatkan pelaburan tertinggi adalah Sabah dengan RM12.0 bilion (28.4%), Selangor dengan RM10.6 bilion (25.1%), diikuti Johor dengan RM4.8 bilion (11.4%), Pulau Pinang dengan RM4.1 bilion (9.7%) dan Negeri Sembilan dengan RM2.6 bilion (6.2%).

Tuan Yang di-Pertua,

Dari Mac 2020 sehingga Jun 2021, terdapat sembilan (9) buah syarikat pengilangan asing yang terdiri daripada sektor tekstil, besi keluli dan jentera serta lain-lain sektor yang telah menamatkan operasi mereka

di Malaysia. Antara syarikat-syarikat yang menamatkan operasi di Malaysia ialah Esquel Malaysia Sdn Bhd dan Pen Apparel Sdn Bhd dalam sektor tekstil, manakala Bekaert Ipoh Sdn Bhd, HOWCO Metal Management Malaysia Sdn Bhd dan Transnorm System Sdn Bhd dalam sektor besi keluli dan jentera.

Terdapat beberapa faktor utama penamatan operasi syarikat-syarikat ini. Antaranya ialah penguncupan ekonomi global disebabkan oleh pandemik COVID-19 dan pasaran yang lemah berikutan penurunan dalam jualan dan permintaan di luar negara. Selain itu, peningkatan kos operasi, persaingan daripada pengeluar yang sama di pasaran tempatan dan luar negara, tiada permintaan bagi produk yang dikeluarkan dan penstrukturan semula syarikat juga merupakan antara faktor penamatan operasi syarikat.

Sungguhpun terdapat syarikat pengilangan asing yang terpaksa menamatkan operasi, Malaysia masih kekal utuh sebagai destinasi pelaburan utama bagi para pelabur di rantau ini. Hal ini terbukti apabila jumlah pelaburan yang diluluskan dalam sektor perkilangan, perkhidmatan dan utama dalam tempoh Januari ke Jun 2021 meningkat sebanyak 69.8% kepada RM107.5 bilion, berbanding dengan tempoh yang sama pada tahun lalu (RM63.3 bilion).

Tuan Yang di-Pertua,

Walaupun negara berhadapan dengan cabaran dan risiko kelembapan ekonomi global dan ketidakseimbangan kewangan ekoran pandemik COVID-19 yang berterusan sejak Mac 2020, Kerajaan sentiasa komited dalam meneruskan usaha bagi menggalakkan pelaburan dalam negara dan seterusnya memastikan Malaysia kekal sebagai lokasi pelaburan yang kompetitif dan berdaya saing bagi menjamin kesejahteraan rakyat dan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HAJI WAN HASSAN BIN MOHD RAMLI
[DUNGUN]**

TARIKH : 12 OKTOBER 2021 (SELASA)

SOALAN:

YB Tuan Haji Wan Hassan Bin Mohd Ramli [Dungun] minta **PERDANA MENTERI** menyatakan langkah yang akan diambil Kerajaan bagi menghadapi musim tengkujuh dan musibah banjir di negeri-negeri Pantai Timur pada akhir tahun ini.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Dipertua,

1. Mesyuarat Jawatankuasa Pengurusan Bencana Pusat (JPBP) pada 13 September 2021 yang dipengerusikan oleh YAB Perdana Menteri telah membincangkan mekanisma pengurusan bencana merentasi pelbagai elemen seperti penambahbaikan Prosedur Operasi Standard (SOP) dan latihan, persiapan tenaga kerja dan bantuan logistik serta bantuan kewangan bagi menghadapi musim tengkujuh yang akan tiba, antaranya seperti berikut:
 - a) SOP dan Latihan:
 - 1) NADMA telah mengeluarkan Garis Panduan Pengurusan Bencana Semasa Pandemik COVID-19 dan Garis Panduan Pengurusan Pusat Pemindahan Sementara sewaktu COVID-19; dan
 - 2) Bengkel dan Latihan Simulasi Koordinasi Pengurusan Bencana bagi Persediaan MTL 2021/2022 pada 7 September 2021 telah disertai oleh 300 orang wakil Jawatankuasa Pengurusan Bencana Negeri dan agensi *responder*.
 - b) Bantuan Tenaga Kerja dan Logistik:
 - 1) Kekuatan sumber manusia agensi-agensi *responder* di ketiga-tiga negeri Pantai Timur adalah seramai 13,274 anggota;
 - 2) Kekuatan aset logistik di ketiga-tiga negeri di Pantai Timur ialah 1,531 kenderaan darat dan air serta 6,689

aset bukan kenderaan (jaket keselamatan, set generator dan lain-lain);

- 3) NADMA dan FAMA akan menghantar 8,000 kit makanan ke Pantai Timur untuk Fasa 1 dan Fasa 2 akan dihantar berdasarkan permintaan;
 - 4) Syarikat-syarikat telekomunikasi akan menghebahkan amaran awal bencana melalui sistem Khidmat Pesanan Ringkas (SMS); dan
 - 5) Jabatan Kebajikan Masyarakat (JKM) telah menyediakan sebanyak 5,731 Pusat Pemindahan Sementara (PPS) di seluruh negara dengan kapasiti 1.6 juta orang mangsa. Terdapat 1,147 fasiliti disediakan bagi menampung keperluan di kawasan-kawasan berisiko bencana.
- c) Bagi aspek bantuan kewangan, NADMA turut mengoptimumkan perbelanjaan operasi dan pemberian wang ihsan kepada mangsa-mangsa banjir melalui penyelarasan peruntukan Tabung Kumpulan Wang Amanah Bantuan Bencana Negara (KWABBN).
2. NADMA sebagai peneraju serta agensi dan jabatan berkaitan pengurusan bencana negara sentiasa melipat ganda usaha memperkemas persediaan menghadapi musim tengkujuh di samping memastikan stok bantuan kepada mangsa yang terjejas dapat disediakan secara sistematik dan menyeluruh.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 12 OKTOBER 2021 (SELASA)

SOALAN NO. 26

TUAN SIVAKUMAR VARATHARAJU NAIDU Minta **PERDANA MENTERI** menyatakan sama ada terdapat menyusutan dalam jumlah kategori M40 dan pertambahan dalam kategori B40. Jika ya, adakah Kerajaan berhasrat untuk membuat pentakrifan semula klasifikasi pengkelasan pendapatan berdasarkan komposisi semasa yang sebenar.

JAWAPAN

YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)

Tuan Yang di-Pertua,

1. Untuk makluman Ahli Yang Berhormat, Jabatan Perangkaan Malaysia telah melaksanakan satu kajian bagi menilai kesan pandemik COVID-19 ke atas pendapatan isi rumah dan kemiskinan bagi tahun 2020. Analisis dilaksanakan berdasarkan kepada data dari Survei Pendapatan Isi Rumah dan Kemudahan Asas (HIS & BA) 2019. Profil isi rumah 2019 yang kemudian disesuaikan dengan corak taburan isi rumah 2020, telah digunakan dalam kajian ini. Oleh kerana fokus kajian ini adalah bagi melihat kesan pandemik COVID-19 ke atas pendapatan isi

rumah, kajian ini tidak mengeluarkan nilai Pendapatan Garis Kemiskinan (PGK) yang baharu. Justeru, nilai PGK 2019 masih dikekalkan.

2. Berdasarkan Laporan Anggaran Pendapatan Isi Rumah dan Insiden Kemiskinan oleh Jabatan Perangkaan Malaysia (DOSM) pada Ogos 2021, pendapatan purata kasar bulanan isi rumah telah menurun sebanyak 10.3% daripada RM7,901 pada tahun 2019 kepada RM7,089 pada tahun 2020. Manakala, insiden kemiskinan mutlak telah meningkat kepada 8.4% daripada 5.6% pada tempoh yang sama. Isi rumah yang dikategorikan sebagai M40 berdasarkan HIS & BA 2019 juga mengalami penurunan pendapatan di bawah had pendapatan B40 tahun 2020. Berdasarkan laporan yang sama, sebanyak 20.0% atau kira-kira 600,000 isi rumah daripada kumpulan isi rumah M40 yang berpendapatan di antara RM4,850 dan RM10,959 telah beralih kepada had pendapatan di bawah kumpulan B40.

3. Sehubungan itu, kajian semula klasifikasi pendapatan akan dijalankan dalam RMKe-12 mengambil kira survei Survei Pendapatan Isi Rumah dan Kemudahan Asas (HIS & BA) pada tahun 2022 dan Banci Penduduk 2020. Analisis daripada survei ini turut dibuat bukan sahaja di peringkat nasional dan negeri, bahkan sehingga ke peringkat daerah pentadbiran. Ini bagi melihat kesan pandemik secara komprehensif dengan mengambil kira pendapatan isi rumah, demografi, kos sara hidup, harga barangan dan perkhidmatan serta lokasi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN YEO BEE YIN [BAKRI]

TARIKH : 12 OKTOBER 2021 (SELASA)

SOALAN

Puan Yeo Bee Yin [Bakri] minta **MENTERI ALAM SEKITAR DAN AIR** menyatakan apakah status perkembangan pembentangan Akta Perubahan Iklim, Akta Pengendalian Bahan Kimia (Chemical Governance Act) dan Akta Kualiti Alam Sekeliling yang baru (atau pindaan bagi akta sedia ada) seperti yang dirancang semasa pentadbiran Pakatan Harapan.

JAWAPAN

Tuan Yang Di-Pertua,

1. Untuk makluman, Kementerian Alam Sekitar dan Air (KASA) masih meneruskan hasrat untuk memantapkan dan mengukuhkan Akta Kualiti Alam Sekeliling 1974 (AKAS 1974) secara menyeluruh. Dalam hubungan ini, fasa pertama akan memberi fokus kepada elemen kompaun, penalti dan standard bagi memastikan tindakan tegas dapat diambil ke atas pelaku dan pesalah yang menyebabkan pencemaran alam sekitar.
2. Pembangunan Akta Perubahan Iklim akan dilaksanakan secara berfasa (*step-wise approach*). Pada masa ini, KASA sedang dalam fasa awal untuk membangunkan kerangka undang-undang perubahan iklim negara.
3. Berkenaan pengurusan tadbir urus kimia di Malaysia terdapat lebih daripada akta dan peraturan yang berkaitan pengurusan bahan kimia yang merentas pelbagai agensi dan sektor. Oleh itu, KASA dalam proses untuk menjalankan kajian lanjut termasuk mewujudkan satu Akta khusus berkenaan pengurusan bahan kimia sekiranya diperlukan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 12 OKTOBER 2021 (SELASA)

SOALAN:

PUAN RUBIAH BINTI HAJI WANG minta **MENTERI KESIHATAN** menyatakan:-

- (a) apakah pelan tindakan yang telah dirancang pihak Kementerian selepas negara mencapai imuniti kelompok; dan
- (b) adakah pihak Kementerian bercadang untuk mengenakan dos ketiga atau lebih bagi Program Imunisasi COVID-19 dalam menghadapi varian merbahaya seperti Delta, Delta Plus dan Lambda.

JAWAPAN

Tuan Yang di-Pertua,

1. Pada 3 Oktober 2021, seramai 87.6% penduduk dewasa telah menerima vaksin COVID-19 yang lengkap. Walau bagaimanapun, PICK akan terus dilaksanakan untuk memastikan seramai mungkin menerima vaksin agar imuniti yang maksimum dapat dibentuk di kalangan masyarakat. Sehubungan dengan itu, aktiviti vaksinasi ("*mopping up*") akan dilaksanakan bagi mereka yang layak tetapi masih belum menerima vaksin. Selain itu, tindakan kesihatan awam masih perlu dilaksanakan secara berterusan termasuk melaksanakan langkah-langkah pencegahan dan kawalan bagi mengawal perebakan jangkitan virus.
2. Kerajaan telah mempertimbangkan untuk pemberian suntikan ketiga berdasarkan kepada data kajian serta maklumat yang diperolehi melalui pemantauan surveilan selepas imunisasi seperti kajian "seroconversion" yang dijalankan di dalam negara dan di luar negara serta syor kumpulan pakar terutama di dalam menghadapi varian-varian baru yang lebih virulen dan cepat merebak.
3. Hasil kajian menunjukkan berlakunya keadaan penurunan antibodi di kalangan penerima vaksin terutama individu yang berisiko tinggi dan yang telah menerima vaksin melebihi 6 bulan dari dos lengkap iaitu pesakit yang mempunyai kurang daya tahan melawan jangkitan (*immunocompromised patients*), petugas barisan hadapan dari sektor kesihatan dan perubatan (HCW) dan individu yang berada di institusi atau pusat jagaan dalam masa yang lama.
4. Dalam hal ini, YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 12 OKTOBER 2021 (SELASA)

SOALAN

TUAN WONG KAH WOH minta **MENTERI KESIHATAN** menyatakan
menyatakan status penetapan harga siling yang berpatutan bagi:

- (a) vaksin sinovac yang dijual dipasaran; dan
- (b) self test kit bagi saringan ujian COVID 19.

JAWAPAN

Tuan Yang di-Pertua,

1. Panel Harga Ubat KKM telah bersidang bagi menetapkan harga maksimum Vaksin COVID-19 bagi vaksin Sinovac (jenama CoronaVac) dan vaksin Sinopharm (jenama Covilo). Pengesyoran harga ini sedang diteliti bersama pihak KPDNHEP dan berada di peringkat akhir perbincangan sebelum dikemukakan kepada Jemaah Menteri.
2. Berhubung dengan harga kit ujian sendiri, Kerajaan menerusi kerjasama Kementerian Perdagangan Dalam Negeri dan Hal Ehwal Pengguna (KPDNHEP) dan Kementerian Kesihatan telah membuat penetapan harga siling bermula pada 5 September yang lalu. Harga siling yang telah diluluskan untuk jualan runcit adalah RM19.90 dan bagi jualan pukal pula adalah sebanyak RM16.00.
3. Pada 21 September 2021, satu perbincangan di antara YB Menteri Kesihatan dan YB Menteri KPDNHEP telah diadakan untuk menurunkan lagi harga jualan ini dalam tempoh masa terdekat. Buat masa ini, pihak KPDNHEP sedang melaksanakan kajian dan mendapatkan pandangan daripada pemegang taruh bagi memastikan harga yang ditetapkan kelak adalah berpatutan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN
CHIK [BALIK PULAU]**

TARIKH : 12 OKTOBER 2021 (SELASA)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **PERDANA MENTERI** menyatakan sama ada Malaysia bersedia untuk meminda dan mengembangkan Seksyen 36 Akta SPRM supaya pengisytiharan harta dapat disahkan melalui penyiasatan.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, SPRM mempunyai kuasa di bawah peruntukan Seksyen 36, Akta Suruhanjaya Pencegahan Rasuah Malaysia (ASPRM) 2009, iaitu peruntukan untuk memperolehi maklumat berkaitan pemilikan harta seseorang individu berdasarkan penyiasatan yang dibuat oleh SPRM dan kemudiannya mempunyai alasan munasabah bahawa apa-apa jumlah wang atau harta benda yang dipegang oleh seseorang merupakan kesalahan rasuah, maka notis pengisytiharan harta boleh dikeluarkan.

Untuk makluman Yang Berhormat jua, Seksyen 36 ASPRM 2009 ini telah dipersetujui oleh semua pihak ketika dibentangkan pada tahun 2009. Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 12 OKTOBER 2021 (SELASA)

SOALAN

TUAN NGA KOR MING minta **PERDANA MENTERI** menyatakan bilakah Kerajaan akan mengemukakan Undang-undang Anti Lompat Parti seperti India dan Singapura supaya sistem demokrasi negara kita dapat dibela serta mengelakkan masalah krisis politik daripada berulang.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Pengenalan Rang Undang-Undang Anti-Lompat Parti merupakan salah satu daripada Agenda Transformasi Kerajaan yang bertujuan memastikan reformasi dan pembaharuan dalam pentadbiran Kerajaan khususnya peranan institusi Parlimen akan terus diperkasakan. Kerajaan komited untuk memastikan Rang Undang-Undang Anti-Lompat Parti yang akan digubal dapat melindungi hak rakyat negara ini yang telah memberi undi serta kepercayaan tinggi kepada ahli politik ketika proses pilihan raya.

Bagi maksud perkara ini dan dengan mengambil kira kewajaran untuk pembentangan dilaksanakan secepat mungkin, Kerajaan akan memastikan sesi libat urus yang menyeluruh diadakan bersama pihak berkepentingan, badan bukan Kerajaan, ahli Parlimen Kerajaan dan Pembangkang serta rakyat agar Rang Undang-Undang baharu yang diperkenalkan mendapat sokongan semua pihak.

Kerajaan akan meneliti dan mempertimbangkan semua cadangan dan input yang diterima daripada pihak berkepentingan termasuk daripada ahli Parlimen Kerajaan dan Pembangkang melalui sesi libat urus yang menyeluruh. Sesi libat urus ini amat penting bagi menetapkan apa jua hala tuju dan parameter gubalan undang-undang. Ini adalah untuk memastikan Rang Undang-Undang ini tidak bertentangan dengan Perlembagaan Persekutuan atau undang-undang lain yang berkuat kuasa termasuk di peringkat negeri.

Dalam perkara ini, Jabatan Perdana Menteri sedang bekerjasama dengan Jabatan Peguam Negara untuk mengkaji penyediaan undang-undang bagi menangani isu lompat parti. Kerajaan akan terus komited dalam memastikan Keluarga Malaysia yang digagaskan dapat mengambil kira semua kepentingan rakyat dan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. LEE BOON CHYE
[GOPENG]**

TARIKH : 12 OKTOBER 2021 (SELASA)

SOALAN

DR. LEE BOON CHYE [GOPENG] minta **PERDANA MENTERI** menyatakan apakah perancangan Kerajaan untuk melaksanakan Undi 18 dan Pendaftaran pengundi secara automatik.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pilihan Raya (SPR) sedang dalam persiapan untuk melaksanakan pindaan Perkara 119 Perlembagaan Persekutuan iaitu berhubung umur kelayakan pengundi 18 tahun dan pendaftaran pemilih secara automatik sebagaimana yang diluluskan oleh Parlimen pada Mesyuarat Kedua Penggal Kedua Parlimen Keempat Belas.

Persiapan yang sedang dilaksanakan oleh SPR ini adalah meliputi pindaan kepada Peraturan-Peraturan Pilihan Raya (Pendaftaran Pemilih) 2002 dan undang-undang lain yang berkaitan, penyediaan standard operating procedures (SOP) dan penyediaan sistem serta infrastruktur bagi pelaksanaan umur kelayakan pengundi 18 tahun dan pendaftaran pemilih secara automatik.

SOALAN NO : 32

Di samping itu, SPR juga telah mengenal pasti beberapa tindakan yang perlu dilaksanakan sebelum pelaksanaan umur kelayakan pengundi 18 tahun dan pendaftaran pemilih secara automatik. Antaranya ialah membuat semakan maklumat bakal pemilih, semakan di lapangan yang melibatkan bakal pengundi berumur 90 tahun dan ke atas, semakan di lapangan ke atas alamat untuk memastikan penentuan bahagian pilihan raya yang tepat, sesi libat urus dengan semua pihak-pihak yang berkepentingan, program pendidikan pengundi kepada bakal pemilih dan menyemak keperluan logistik bagi persediaan menghadapi Pilihan Raya Umum Ke-15 yang akan datang.

SOALAN NO : 32

SPR menjangkakan semua persiapan yang sedang diambil tindakan termasuklah menangani isu-isu yang berkaitan ini akan dapat diselesaikan dan seterusnya melaksanakan umur kelayakan pengundi 18 tahun dan pendaftaran pemilih secara automatik selewat-lewatnya pada September 2022.

Namun demikian, keputusan semakan kehakiman isu Undi 18 di Mahkamah Tinggi Kuching telah memerintahkan supaya umur kelayakan pengundi 18 tahun dan pendaftaran pemilih secara automatik dilaksanakan selewat-lewatnya pada 31 Disember 2021.

Justeru, walaupun dengan kekangan dan kekurangan, **SPR komited untuk memastikan umur kelayakan pengundi 18 tahun dan pendaftaran pemilih secara automatik berdasarkan kepada keputusan mahkamah.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN FONG KUI LUN
[BUKIT BINTANG]**

TARIKH : 12 OKTOBER 2021 (SELASA)

SOALAN

TUAN FONG KUI LUN minta **MENTERI KESIHATAN** menyatakan jenis-jenis vaksin yang diguna pakai di negara ini bagi mewujudkan lebih banyak imuniti berkelompok sebagai langkah menyekat penularan wabak COVID-19 dan kos pembelian setiap jenis vaksin yang ditanggung oleh Kerajaan setakat ini.

JAWAPAN

Tuan Yang di-Pertua,

1. Terdapat lima (5) jenis vaksin di bawah Program Imunisasi COVID-19 Kebangsaan (PICK) yang telah disenaraikan dalam portfolio PICK. Sehingga 4 Oktober 2021, empat (4) jenis vaksin yang telah digunapakai iaitu vaksin Pfizer & BioNTech, AstraZeneca, Sinovac dan Cansino. Satu lagi vaksin iaitu Sputnik V keluaran Gamaleya ketika ini masih di dalam proses penilaian oleh Bahagian Regulatori Farmasi Negara sebelum diluluskan pendaftarannya oleh Pihak Berkuasa Kawalan Dadah (PBKD).

2. Sebanyak 87.9 juta dos vaksin telah ditempah oleh Kementerian Kesihatan Malaysia (KKM) melalui Fasilitas COVAX dan secara rundingan terus dengan beberapa pengeluar vaksin COVID-19 yang melibatkan implikasi kewangan sebanyak **RM4.64 billion yang meliputi kos vaksin dan logistik vaksin.**

3. Memandangkan Kerajaan Malaysia terikat dengan *Non Disclosure Agreement* (NDA) iaitu syarat kerahsiaan yang ditetapkan syarikat pengeluar vaksin, maklumat-maklumat terperinci setiap perjanjian tidak boleh didedahkan termasuklah harga vaksin. Walau bagaimanapun, kos perolehan bagi setiap jenis vaksin telah dijelaskan dalam Prosiding Jawatankuasa Kira-Kira Wang Negara (PAC), Mesyuarat Khas Parlimen Keempat Belas yang diadakan pada 2 Ogos 2021 yang lalu.

4. Dalam pada masa yang sama, Kerajaan Malaysia telah menerima sumbangan vaksin COVID-19 sebanyak **2.91 juta dos** daripada negara Jepun (AstraZeneca - 998,400), Amerika Syarikat (Pfizer - 1,000,350), China (SinoVac - 500 ribu) dan United Kingdom (AstraZeneca - 415 ribu).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DR. ONG KIAN MING
[BANGI]**

TARIKH : 12 OKTOBER 2021

SOALAN

Dr. Ong Kian Ming [Bangi] minta **MENTERI KANAN PERDAGANGAN ANTARABANGSA DAN INDUSTRI** menyatakan kemajuan mengenai ratifikasi RCEP dan CPTPP dan apakah rancangan untuk memulakan semula rundingan dengan EU untuk FTA.

JAWAPAN

Tuan Yang di-Pertua,

Perjanjian Perkongsian Ekonomi Komprehensif Serantau (RCEP) yang telah ditandatangani oleh Malaysia pada 15 November 2020, merupakan Perjanjian Perdagangan Bebas (*Free Trade Agreement – FTA*) di antara negara-negara anggota ASEAN dan lima (5) Rakan Dialog ASEAN iaitu Australia, Republik Rakyat China, Korea, Jepun dan New Zealand. RCEP akan berkuatkuasa apabila sekurang-kurangnya enam (6) buah negara anggota ASEAN dan tiga (3) Rakan Dialog meratifikasi Perjanjian tersebut. Pada masa ini, Republik Rakyat China, Jepun dan Singapura telah meratifikasi RCEP dan adalah dijangka Perjanjian ini akan dikuatkuasakan pada 1 Januari 2022.

Bagi Malaysia pula, Kerajaan sedang melaksanakan usaha-usaha ke arah meratifikasi RCEP. Bagi tujuan itu, untuk melengkapkan proses ratifikasi ini, tiga (3) Akta di bawah bidang kuasa Kementerian Perdagangan Dalam Negeri dan Hal-Ehwal Pengguna (KPDNHEP) yang berkaitan hak harta intelek iaitu Akta Paten 1983 (*Patents Act 1983*), Akta Hak Cipta 1987 (*Copyright Act 1987*) dan Akta Cap Dagangan 2019 (*Trademarks Act 2019*) perlu dipinda. Ini adalah bagi memastikan ketiga-tiga Akta tersebut adalah sejajar dengan komitmen dan obligasi negara di bawah Perjanjian RCEP. Dalam hal ini, MITI telah dimaklumkan oleh pihak KPDNHEP bahawa draf pindaan bagi kesemua Akta ini sedang diperhalusi oleh Jabatan Peguam Negara dan dijangka akan dibentangkan di Parlimen, pada Disember tahun ini.

Tuan Yang Dipertua,

Perjanjian Komprehensif dan Progresif bagi Perkongsian Trans-Pasifik, atau dengan izin, *Comprehensive and Progressive Agreement for Trans-Pacific Partnership* (CPTPP) pula merupakan sebuah FTA di antara 11 buah negara anggota di rantau Asia Pasifik yang telah ditandatangani oleh Malaysia pada 8 Mac 2018. Perjanjian CPTPP telahpun berkuatkuasa pada

30 Disember 2018 bagi enam (6) buah negara iaitu Australia, Kanada, Jepun, Mexico, New Zealand dan Singapura. Viet Nam merupakan negara ketujuh yang menguatkuasakan Perjanjian ini pada 14 Januari 2019.

Terkini, Peru menjadi negara kelapan yang menguatkuasakan Perjanjian CPTPP pada 19 September 2021. Perjanjian CPTPP masih lagi belum diratifikasi dan dikuatkuasakan oleh baki tiga (3) buah negara anggota, iaitu Brunei Darussalam, Chile dan Malaysia.

Seperti mana Dewan yang mulia ini sedia maklum, tiga tahun yang lalu, pada 5 September 2018, Jemaah Menteri telah bersetuju agar Malaysia meratifikasi Perjanjian CPTPP, tetapi tidak menetapkan sebarang tarikh atau garis masa untuk negara berbuat demikian.

Penguatkuasaan Perjanjian CPTPP kini sudah memasuki tahun ketiga. Ini juga bermakna bahawa sepanjang tiga tahun ini, Malaysia telah ketinggalan bukan sahaja dalam menikmati faedah dan layanan keutamaan, dengan izin preferential *treatment* yang ditawarkan oleh lapan (8) negara yang telah menguatkuasakan Perjanjian CPTPP, tetapi juga kerjasama dari segi program bina upaya dan bantuan teknikal yang ditawarkan di bawah Perjanjian ini.

Pada hari ini, kita dapat perhatikan banyak negara telah menunjukkan minat untuk menyertai CPTTP, yang dilihat menawarkan pelbagai manfaat ekonomi kepada anggota-anggotanya. Pada 1 Februari 2021, United Kingdom (UK) menjadi negara pertama memohon secara rasmi untuk menyertai Perjanjian CPTPP. Dalam hal ini, sebagai negara yang masih belum meratifikasi Perjanjian CPTPP, penglibatan Malaysia dalam rundingan kemasukan, atau dengan izin, *accession negotiations*, di antara UK dan CPTPP, adalah sangat terhad.

Selain daripada UK, Republik Rakyat China dan Taiwan telah turut memohon secara rasmi untuk menyertai CPTPP baru-baru ini. Negara-negara lain seperti Republik Korea, Thailand dan Filipina juga telah secara terbuka menyuarakan hasrat untuk menyertai Perjanjian CPTPP. Oleh yang

demikian, ingin saya maklumkan bahawa Kerajaan sedang mengambil langkah-langkah konkrit bagi membolehkan Malaysia meratifikasi CPTPP dalam kadar segera.

Antara lain, Kerajaan telah mempergiatkan usaha bagi melengkapkan pindaan ke atas Akta-akta yang berkaitan, bagi membolehkan Malaysia meratifikasi Perjanjian CPTPP. Berdasarkan teks perjanjian sedia ada, Malaysia perlu meminda sebanyak 14 Akta sebelum Perjanjian CPTPP boleh diratifikasi dan dikuatkuasakan oleh Malaysia. Pindaan ini bukan sahaja bagi mematuhi obligasi di bawah CPTPP, malahan juga dilihat amat penting dalam pembaharuan di peringkat domestik bagi memastikan undang-undang di Malaysia dikemaskini dan selaras dengan perjanjian dan norma-norma antarabangsa.

Sehingga kini, sebanyak enam (6) Akta di bawah bidang kuasa Kementerian Sumber Manusia, Kementerian Perdagangan Dalam Negeri dan Hal Ehwal Pengguna dan Suruhanjaya Pencegahan Rasuah Malaysia telah dibentangkan dan diluluskan di Parlimen yang mana kesemua Akta ini telah diselaraskan dengan mengambilkira komitmen Malaysia di bawah Perjanjian CPTPP. Akta-akta tersebut adalah seperti berikut:

- (i) Akta Agensi Pekerjaan Swasta 1981;
- (ii) Akta Suruhanjaya Pencegahan Rasuah Malaysia 2009;
- (iii) Akta Kanak-kanak dan Orang Muda (Pekerjaan) 1966;
- (iv) Akta Standard Minimum Perumahan, Penginapan dan Kemudahan Pekerja 1990;
- (v) Akta Perhubungan Perusahaan 1967; dan
- (vi) Akta Cap Dagangan 1976.

Senarai baki lapan (8) Akta yang masih perlu dipinda dan diluluskan di Parlimen adalah seperti berikut:

Kementerian Sumber Manusia

- (i) Akta Kerja 1955;
- (ii) Akta Kesatuan Sekerja 1959;
- (iii) Ordinan Buruh (Sabah Bab 67);
- (iv) Ordinan Buruh (Sarawak Bab 76);

Kementerian Perdagangan Dalam Negeri dan Hal Ehwal Pengguna

- (i) Akta Petunjuk Geografi 2000;
- (ii) Akta Paten 1983;
- (iii) Akta Hak Cipta 1987; dan

Kementerian Komunikasi dan Multimedia

- (i) Akta Komunikasi dan Multimedia 1998

Tuan Yang Dipertua,

Berhubung dengan rundingan FTA di antara Malaysia dan Kesatuan Eropah yang dimulakan pada tahun 2010, ianya telah ditangguhkan pada tahun 2012 berikutan kegagalan kedua-dua pihak mencapai kesepakatan bagi meneruskan perbincangan berkaitan isu-isu sensitif seperti Perolehan Kerajaan (*Government Procurement*), Dasar Bumiputera, Hak Harta Intelek dan isu Halal. Selain itu, permintaan pihak EU agar mereka diberi layanan yang lebih baik berbanding dengan komitmen Malaysia di dalam CPTPP tidak dapat dipenuhi oleh Malaysia.

Malah, semasa pertemuan di antara MITI dan Kementerian Kewangan, Kementerian Perdagangan Dalam Negeri dan Hal Ehwal Pengguna, Kementerian Pertanian dan Industri Makanan, Jabatan Kemajuan Islam Malaysia dan Jabatan Peguam Negara, kesemua agensi ini telah menegaskan bahawa mereka tidak bersetuju dengan permintaan daripada EU untuk mendapat layanan yang melebihi komitmen Malaysia di dalam CPTPP.

Justeru itu, Jemaah Menteri pada 18 September 2019 telah bersetuju untuk menangguhkan rundingan FTA dengan EU sehingga Malaysia benar-benar bersedia untuk membincangkan kesemua permintaan daripada pihak EU. Ini membuktikan Kerajaan mengambil berat dan bertanggungjawab untuk memastikan setiap FTA yang disertai oleh Malaysia akan memberi impak positif kepada ekonomi dan kesejahteraan rakyat secara keseluruhan.

Pada tahun lepas, Kementerian Perdagangan Antarabangsa dan Industri (MITI) telah menganjurkan beberapa sesi libat urus bersama pihak industri dan pemegang taruh untuk mendapatkan pandangan dan maklum balas terkini daripada mereka berkaitan Malaysia-EU FTA. Hasil daripada sesi libat urus tersebut, majoriti daripada responden berharap agar Malaysia dan EU dapat menyambung semula rundingan FTA kerana berpandangan ia akan meningkatkan daya saing industri, meluaskan akses pasaran dan meningkatkan aktiviti perdagangan yang terjejas sejak skim *Generalised Scheme of Preferences* (GSP) yang sebelum ini ditawarkan oleh EU, ditamatkan pada 31 Disember 2013. Sistem GSP EU ini menawarkan layanan keutamaan bagi eksport Malaysia di pasaran EU, sejak Januari 2006. Walau bagaimanapun, apabila Malaysia disenaraikan sebagai *upper middle income economy* oleh Bank Dunia selama tiga tahun berturut-turut, layanan GSP ini telah dihentikan oleh EU. Oleh yang demikian, sejak 1 Januari 2014, kesemua eksport Malaysia ke EU tidak mendapat sebarang layanan keutamaan.

Walaupun bagaimanapun, keputusan samada untuk menyambung semula atau pun tidak rundingan FTA dengan EU, hanya akan dibuat setelah pihak Kerajaan meneliti semua perkara yang berkaitan dengan FTA ini, termasuk kesukaran dan cabaran yang bakal dihadapi dalam menangani permintaan EU kelak, khususnya yang berkaitan dengan Perolehan Kerajaan, Hak Harta Intelektual dan Halal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DR. KELVIN YII LEE WUEN (BANDAR KUCHING)

TARIKH : 12 OKTOBER 2021 (SELASA)

SOALAN

DR. KELVIN YII LEE WUEN minta **PERDANA MENTERI** menyatakan hasrat Kerajaan mengenai seksyen 309 Kanun Keseksaan untuk 'Decriminalise Attempted Suicide' untuk menangani isu peningkatan jumlah cubaan membunuh diri di seluruh Malaysia.

JAWAPAN

Tuan Yang di-Pertua,

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Untuk makluman Ahli Yang Berhormat, Kerajaan melalui Jabatan Peguam Negara (AGC) telah mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia kerana berdasarkan statistik setakat 2015 insiden percubaan membunuh diri semakin meningkat dan meliputi pelbagai peringkat umur. Isu percubaan membunuh diri menjadi lebih meruncing pada masa ini kerana keadaan ekonomi yang tidak menentu menjadikan ramai kehilangan sumber pendapatan atau hilang pekerjaan. Oleh yang demikian, pendekatan yang lebih holistik perlu diambil untuk mengekang perbuatan tersebut.

Berdasarkan hasil kajian perbandingan peruntukan undang-undang mengenai percubaan untuk membunuh diri di United Kingdom,

SOALAN NO : 35

New Zealand, India dan Singapura, didapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan. Ini bermakna percubaan membunuh diri bukan lagi suatu kesalahan jenayah di negara-negara tersebut.

Oleh itu, berdasarkan perkembangan undang-undang berkaitan di negara yang dikaji, AGC sedang menimbang cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan bagi mendapatkan rawatan yang sewajarnya.

AGC juga sedang meneliti dengan lebih lanjut pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, AGC sedang meneliti keperluan untuk meminda undang-undang lain yang berbangkit daripada pengeluaran kesalahan percubaan membunuh diri daripada sistem jenayah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN NOOR AMIN BIN AHMAD
[KANGAR]**

TARIKH : 12 OKTOBER 2021 (SELASA)

SOALAN

TUAN NOOR AMIN BIN AHMAD minta **PERDANA MENTERI** menyatakan sama ada satu pindaan Perlembagaan akan dibuat bagi mengelak kekeliruan tentang bidang kuasa antara Yang di-Pertuan Agong dan tiga cabang Kerajaan iaitu Eksekutif, Legislatif dan Kehakiman khususnya dalam persoalan pelantikan dan penggantian Ketua Eksekutif.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Tiga cabang Kerajaan iaitu Eksekutif, Legislatif dan Kehakiman merupakan elemen utama dalam konsep pemisahan atau pengasingan kuasa yang menjadi sebahagian daripada struktur asas Perlembagaan Persekutuan. Konsep pemisahan atau pengasingan kuasa merupakan suatu doktrin yang mengesyorkan pengasingan kuasa antara badan eksekutif, badan perundangan dan badan kehakiman untuk mengelakkan berlakunya ketidakadilan sekiranya kuasa itu dipegang oleh suatu badan sahaja. Di Malaysia, doktrin ini telah dijelaskan oleh Mahkamah Persekutuan dalam kes *Public Prosecutor v Kok Wah Kuan [2008] 1 MLJ 1*.

Walaupun Perlembagaan Persekutuan tidak memperuntukkan secara nyata mengenai konsep pengasingan kuasa antara badan eksekutif, badan perundangan dan badan kehakiman, namun pengasingan kuasa antara ketiga-tiga badan ini dinyatakan secara tersirat dalam Perlembagaan Persekutuan khususnya dalam Bahagian IV iaitu Bab 3 bagi Badan Eksekutif dan Bab 4 bagi Badan Perundangan Persekutuan dan Bahagian IX bagi Badan Kehakiman.

Berhubung dengan badan eksekutif, Perkara 39 Perlembagaan Persekutuan memperuntukkan kuasa eksekutif hendaklah terletak hak pada Yang di-Pertuan Agong dan, tertakluk kepada peruntukan mana-mana undang-undang persekutuan dan peruntukan Jadual Kedua, bolehlah dijalankan olehnya atau oleh Jemaah Menteri atau oleh mana-mana Menteri yang diberi kuasa oleh Jemaah Menteri, tetapi Parlimen boleh, melalui undang-undang, memberikan fungsi eksekutif kepada orang lain. Kedudukan mengenai kuasa eksekutif ini telah disahkan oleh Mahkamah Tinggi dalam kes ***Kerajaan Malaysia v. Shimizu Corp & Ors [2018] MLJU 169.***

Berhubung dengan badan perundangan pula, Perkara 44 Perlembagaan Persekutuan memperuntukkan kuasa perundangan Persekutuan hendaklah terletak hak pada Parlimen yang hendaklah terdiri daripada Yang di-Pertuan Agong dan dua Majlis Parlimen yang dikenali sebagai Dewan Negara dan Dewan Rakyat. Berdasarkan Perkara 66 Perlembagaan Persekutuan, kuasa Parlimen adalah untuk menggubal undang-undang. Secara konsepnya, Parlimen Malaysia adalah bebas dan berasingan daripada badan eksekutif dan juga badan kehakiman.

Kuasa Kehakiman pula telah diperuntukkan dalam Bahagian IX Perlembagaan Persekutuan. Berdasarkan Perkara 121 Perlembagaan Persekutuan, kuasa kehakiman Persekutuan diperuntukkan kepada dua Mahkamah Tinggi yang setara bidang kuasa dan tarafnya iaitu Mahkamah Tinggi di Malaya dan Mahkamah Tinggi di Sabah dan Sarawak, dan mana-mana mahkamah bawahan sebagaimana yang diperuntukkan oleh undang-undang Persekutuan, Mahkamah Rayuan dan Mahkamah Persekutuan.

Selain daripada yang diperuntukkan dalam Bahagian IX Perlembagaan Persekutuan, bidang kuasa bagi mahkamah-mahkamah tersebut turut diperuntukkan di bawah undang-undang Persekutuan antaranya Akta Mahkamah Rendah 1948 [Akta 92] dan Akta Mahkamah Kehakiman 1964 [Akta 91]. Kuasa mahkamah secara umumnya adalah untuk mentafsirkan undang-undang serta mendengar dan mengadili sesuatu pertikaian.

Setiap organ ini mempunyai kuasa eksklusif yang berbeza antara satu sama lain dan setiap daripadanya dilindungi daripada pencerobohan (encroachment) kuasa oleh yang lain sebagaimana yang diputuskan oleh Mahkamah Persekutuan dalam kes ***Maria Chin Abdullah v. Ketua Pengarah Imigresen & Anor [2021] 2 CLJ 579.***

Selain itu, sungguhpun Parlimen telah diperuntukkan kuasa perundangan, kuasa tersebut boleh diberikan oleh Parlimen kepada badan eksekutif apabila sesuatu perundangan memperuntukkan kuasa kepada Menteri untuk membuat perundangan subsidiari atau ketika waktu darurat sebagaimana yang diperuntukkan di bawah Fasal (2B) dan (2C) Perkara 150 Perlembagaan Persekutuan yang memberi kuasa yang luas kepada Yang di-Pertuan Agong untuk membuat ordinar darurat.

Berhubung dengan persoalan sama ada satu pindaan Perlembagaan akan dibuat bagi mengelak kekeliruan tentang bidang kuasa antara Yang di-Pertuan Agong dan tiga cabang Kerajaan iaitu Eksekutif, Legislatif dan Kehakiman khususnya dalam persoalan pelantikan dan penggantian Ketua Eksekutif, sebagaimana yang telah dijelaskan sebelum ini, Perlembagaan Persekutuan telah memperuntukkan dengan jelas mengenai bidang kuasa antara ketiga-tiga cabang Kerajaan tersebut

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SIM CHEE KEONG
[BUKIT MERTA JAM]**

TARIKH : 12 OKTOBER 2021 (SELASA)

SOALAN:

Tuan Sim Chee Keong [Bukit Mertajam] minta **PERDANA MENTERI** menyatakan perbelanjaan yang telah digunakan untuk J-KOM mengikut pecahan kategori jenis aktiviti, bilangan pekerja serta kontraktor dan perbelanjaan khusus untuk Covid-19

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sehingga 26 Ogos 2021, JKOM telah membelanjakan sejumlah RM2.178 juta bagi tujuan seperti berikut:
 - a. Sejumlah RM1.779 juta untuk bayaran emolumen, elaun dan tuntutan perjalanan bagi 52 kakitangan tetap dan 35 anggota MySTEP.
 - b. Sejumlah RM77.4 ribu adalah perbelanjaan pengoperasian pejabat yang merangkumi perbelanjaan bekalan, sewaan dan penyelenggaraan kelengkapan pejabat.
 - c. Sejumlah RM14,500.00 perbelanjaan khusus untuk pelaksanaan program berkaitan isu pandemik Covid-19 iaitu program menyantuni petugas barisan hadapan dan pesakit COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB TUAN OSCAR LING CHAI YEW [SIBU]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan pembahagian vaksin COVID-19 ke setiap negeri dan wilayah, senaraikan jumlah dos yang didapati oleh setiap negeri dan wilayah, dan rasional untuk memberikan keutamaan kepada negeri tertentu. Mengapakah kes masih meningkat di wilayah Sarawak walaupun sudah mencapai taraf immunisasi yang melebihi 80%.

JAWAPAN

Tuan Yang di-Pertua,

Untuk makluman Ahli Yang Berhormat,

Setakat 5 Oktober 2021, jumlah agihan bekalan vaksin adalah seperti berikut:

Bil	Negeri	Bekalan vaksin
1	Johor	5,706,280
2	Kedah	3,160,842
3	Kelantan	2,510,280
4	Melaka	1,427,750
5	Negeri Sembilan	1,775,898
6	Pahang	2,323,382
7	Perak	3,657,750
8	Perlis	382,170
9	Pulau Pinang	2,949,670
10	Sabah	4,880,476
11	Sarawak	4,302,020
12	Greater Klang Valley	14,355,386
13	Terengganu	1,817,860
14	W.P. Labuan	226,100
	Jumlah	49,475,864

Keutamaan agihan vaksin adalah bergantung kepada keperluan vaksinasi di negeri masing-masing termasuk keutamaan pelaksanaan fasa kawalan wabak bagi zon-zon merah yang tinggi di negeri-negeri tersebut.

Mengenai persoalan kes masih meningkat di Sarawak walaupun kadar imunisasi hampir 90% populasi dewasa, jumlah kes terkini di Sarawak telahpun menurun kepada 1,037 kes setakat 11 Oktober 2021 berbanding 3,743 kes pada 11 September 2021. Penurunan kes ini membuktikan bahawa vaksin COVID-19 berkesan dalam melindungi rakyat Malaysia terutamanya di Sarawak. Walau bagaimanapun, kajian masih dijalankan bagi menentukan keberkesanan vaksin terhadap *variant of concern* (VOC) COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 12 OKTOBER 2021 (SELASA)

SOALAN :

YB DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan sejauh manakah pelaksanaan setiap cadangan yang terkandung dalam Laporan RCI Mengenai Pendatang Tanpa Izin di Sabah terutama sekali cadangan untuk menggantikan kad pengenalan yang ada sekarang kepada yang baru dan bercirikan digital.

JAWAPAN

**YB DATUK DR. ABDUL LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Berkaitan cadangan pertama Laporan Siasatan Diraja (RCI) Mengenai Pendatang Tanpa Izin di Sabah, pihak Kerajaan telah menubuhkan Jawatankuasa Pengurusan Warga Asing di Sabah (JKPWAS) pada 3 Disember 2014. Jawatankuasa ini dipengerusikan secara bersama antara Menteri Dalam Negeri dan Ketua Menteri Sabah.
2. Bagi pelaksanaan cadangan kad pengenalan diri khas kepada pendatang tanpa izin pula, Mesyuarat JKPWAS pada 12 Mei 2015 telah bersetuju pelaksanaan Pas Residen kepada pendatang asing di Sabah untuk mengelak risiko pemalsuan dokumen. Pas Residen ini kemudiannya telah ditukar nama kepada Pas Residen Sementara Sabah (PRESS) pada tahun 2016.
3. Pada tahun 2019, PRESS telah ditukar nama kepada Pas Sementara Sabah (PSS) dengan matlamat menggabungkan semua pemegang kad IMM13 yang dikeluarkan oleh Jabatan Imigresen Malaysia, Kad Burung-Burung yang dikeluarkan oleh Jabatan Ketua Menteri dan Kad Banci yang dikeluarkan oleh Majlis Keselamatan Negara (MKN). Walau bagaimanapun, pelaksanaan PSS ini telah dibatalkan pada 22 Januari 2020.
4. Dalam hubungan ini, pihak Kerajaan sedang dalam proses meneliti semula strategi pelaksanaan yang bersesuaian untuk cadangan ini. Melalui platform JKPWAS, kedua-dua pihak sentiasa mencari jalan penyelesaian terbaik bagi memastikan isu pendatang tanpa izin dapat diselesaikan dengan baik.
5. Kerajaan Persekutuan dan Negeri kekal komited untuk melaksanakan semua cadangan dalam Laporan RCI Mengenai Pendatang Tanpa Izin di Sabah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN
DARIPADA : TUAN WONG HON WAI
[BUKIT BENDERA]
TARIKH : 12 OKTOBER 2021 (SELASA)

SOALAN :

TUAN WONG HON WAI [BUKIT BENDERA] minta **PERDANA MENTERI** menyatakan memandangkan ramai isi rumah yang terkesan akibat pandemik COVID-19 seperti yang dilaporkan oleh Laporan Anggaran Pendapatan Isi Rumah dan Insiden Kemiskinan, Malaysia (2020), apakah inisiatif baharu Kerajaan untuk mendaftarkan mereka di bawah sistem eKasih dan lain-lain bantuan kebajikan.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

1. Kerajaan telah membangunkan Sistem eKasih sebagai pangkalan data kemiskinan nasional pada tahun 2008 bertujuan untuk mendaftarkan golongan miskin di Malaysia berdasarkan Pendapatan Garis Kemiskinan (PGK). Kriteria penetapan kategori kemiskinan adalah bergantung kepada jumlah pendapatan per kapita isi rumah dan berasaskan kepada formula perkiraan yang disediakan oleh Jabatan Perangkaan Malaysia dan Unit Perancang Ekonomi, Jabatan Perdana Menteri (UPE, JPM) melalui Penyiasatan Pendapatan Isi Rumah 2019 (*Household Income Survey* 2019). PGK semasa (2019) adalah RM2,208 berbanding PGK terdahulu (2016) iaitu RM980.
2. Profil isi rumah miskin diperolehi melalui kaedah bancian di lapangan melalui sesi temu ramah/ bersemuka serta dapatan di lokasi tempat kediaman isi rumah berkaitan. Golongan bersasar yang akan dibanci juga adalah berdasarkan maklumat diterima daripada pelbagai pihak termasuk pemimpin tempatan, individu/masyarakat dan agensi-agensi Kerajaan Persekutuan dan Negeri serta aduan di dalam media sosial.
3. Antara inisiatif baharu adalah penubuhan Majlis Perlindungan Sosial Malaysia (MySPC) pada Disember 2019 sebagai langkah yang lebih menyeluruh kepada rakyat agar tiada yang tercicir dan terpinggir daripada menerima bantuan yang sewajarnya. Satu pangkalan data berpusat sedang dibangunkan iaitu Pangkalan Data Perlindungan Sosial (PDPS) yang akan menjadi platform pengurusan maklumat perlindungan sosial yang efektif, termasuk bantuan-bantuan untuk kumpulan miskin tegar dan miskin bagi memastikan tiada lagi *inclusion or exclusion error* di dalam penyaluran perlindungan serta bantuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : YB DATO' NGEH KOO HAM [BERUAS]

TARIKH : 12 OKTOBER 2021 (SELASA)

SOALAN

YB Dato' Ngeh Koo Ham [Beruas] minta **PERDANA MENTERI** menyatakan sama ada Ordinan-Ordinan Darurat yang dimasyhurkan oleh Yang di-Pertuan Agong di bawah pengisytiharan darurat bertarikh 11 Januari 2021 telah dimansuhkan pada 21 Julai 2021 dan menyatakan pendirian dan tindakan Kerajaan berkenaan dengan Ordinan-Ordinan Darurat tersebut selepas 21 Julai 2021.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Semasa Proklamasi Darurat 2021 [*P.U. (A) 7/2021*] ("Proklamasi Darurat 2021") sedang berkuat kuasa mulai 11 Januari 2021 hingga 1 Ogos 2021, Yang di-Pertuan Agong ("YDPA") telah memasyhurkan tujuh (7) ordinan darurat selaras dengan Perkara 150(2B) Perlembagaan Persekutuan ("PP") seperti yang berikut:

- (a) Ordinan Darurat (Kuasa-Kuasa Perlu) 2021
[*P.U. (A) 12/2021*];

SOALAN NO : 41

- (b) Ordinan Darurat (Pencegahan dan Pengawalan Penyakit Berjangkit) (Pindaan) 2021 [*P.U. (A) 76/2021*];
- (c) Ordinan Darurat (Standard Minimum Perumahan, Penginapan dan Kemudahan Pekerja) (Pindaan) 2021 [*P.U. (A) 77/2021*];
- (d) Ordinan Darurat (Kuasa-Kuasa Perlu) (No.2) 2021 [*P.U. (A) 110/2021*];
- (e) Ordinan Darurat (Kuasa-Kuasa Perlu) (Pindaan) 2021 [*P.U. (A) 151/2021*];
- (f) Ordinan Darurat (Kehadiran Wajib Pesalah-Pesalah) (Pindaan) 2021 [*P.U. (A) 173/2021*]; dan
- (g) Ordinan Darurat (Kumpulan Wang Amanah Negara) (Pindaan) 2021 [*P.U. (A) 186/2021*].

Ordinan-ordinan Darurat di atas secara bersama dirujuk sebagai “Ordinan Darurat 2021”.

Ordinan Darurat 2021 berkuat kuasa sehingga dibatalkan, diumumkan atau terhenti berkuat kuasa mengikut kedudukan undang-undang seperti yang berikut:

- (a) dibatalkan oleh YDPA mengikut Perkara 150(3) PP semasa Proklamasi Darurat 2021 sedang berkuat kuasa;
- (b) diumumkan melalui suatu ketetapan yang diluluskan di hadapan kedua-dua Majlis Parlimen mengikut Perkara 150(3) PP; atau
- (c) terhenti berkuat kuasa mengikut Perkara 150(7) PP setelah habis tempoh enam (6) bulan Proklamasi Darurat 2021 terhenti berkuat kuasa iaitu mulai 2 Februari 2022,

mengikut mana-mana yang terdahulu.

YAB Perdana Menteri dalam kenyataan media bertarikh 3 Ogos 2021 memaklumkan proses pembatalan Ordinan Darurat 2021 oleh YDPA sepertimana yang disembah nasihat oleh Jemaah Menteri pada 23 Julai 2021 tidak dapat disempurnakan.

Sehubungan dengan itu, memandangkan Proklamasi Darurat 2021 [P.U.(A) 7/2021] ("Proklamasi Darurat 2021") telah terhenti berkuat kuasa pada 2 Ogos 2021, maka YDPA tidak lagi diperuntukkan dengan kuasa untuk membatalkan Ordinan Darurat 2021 di bawah Perkara 150(3) PP.

Kaedah lain untuk membatalkan Ordinan Darurat 2021 adalah melalui proses pengungkapan di hadapan kedua-dua Majlis Parlimen mengikut Perkara 150(3) PP.

Bagi tujuan mengemukakan Ordinan Darurat 2021 oleh Majlis Parlimen mengikut Perkara 150(3) PP, **ketetapan untuk mengemukakan Ordinan Darurat 2021 hendaklah diluluskan oleh kedua-dua Majlis Parlimen.**

Setakat Mesyuarat Khas Penggal Ketiga Parlimen Keempat Belas Majlis Mesyuarat Dewan Rakyat, diperhatikan **tiada apa-apa ketetapan berhubung dengan pengungkapan mana-mana Ordinan Darurat 2021 telah diluluskan oleh Majlis Parlimen.**

Sehubungan dengan itu, Ordinan Darurat 2021 masih berkuat kuasa sehingga diungkapkan melalui ketetapan yang diluluskan oleh kedua-dua Majlis Parlimen.

Namun begitu, sekiranya Parlimen tidak mengungkap Ordinan Darurat 2021 di bawah Perkara 150(3) PP, Perkara 150(7) PP memperuntukkan Ordinan Darurat 2021 hanya akan terhenti berkuat kuasa setelah habis tempoh enam (6) bulan Proklamasi Darurat 2021 tamat (*grace period*) iaitu mulai 2 Februari 2022.

SOALAN NO : 41

Selain itu, walaupun Ordinan Darurat 2021 masih berkuat kuasa sehingga diumumkan oleh Parlimen di bawah Perkara 150(3) PP atau sehingga habis tempoh enam (6) bulan *grace period* di bawah Perkara 150(7) PP, bagi peruntukan Ordinan Darurat 2021 yang mempunyai ungkapan "*Bagi tempoh darurat berkuat kuasa*" (*For so long as the emergency is in force*), peruntukan tersebut berkuat kuasa selama jangka hayat Proklamasi Darurat 2021 berkuat kuasa memandangkan peruntukan-peruntukan berkenaan berkait rapat dengan hak-hak yang termaktub dalam PP dan perkara-perkara yang asas kepada hak asasi manusia serta sesuatu negara yang mengamalkan sistem demokrasi, dan kewujudan peruntukan-peruntukan berkenaan selepas darurat tamat berkuat kuasa adalah sukar untuk dibela atau diberi justifikasi.

Dalam hal ini, memandangkan Proklamasi Darurat 2021 telahpun terhenti berkuat kuasa pada 2 Ogos 2021, maka peruntukan Ordinan Darurat 2021 yang mempunyai ungkapan "*Bagi tempoh darurat berkuat kuasa*" juga telah terhenti berkuat kuasa pada 2 Ogos 2021.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 12 OKTOBER 2021 (SELASA)

SOALAN

TUAN OSCAR LING CHAI YEW minta **MENTERI KESIHATAN** adakah dos vaksin COVID-19 ketiga akan dilancarkan secepat mungkin, supaya keberkesanan vaksin terhadap varian Delta dan Lambda boleh ditingkatkan. Nyatakan rancangan Kementerian dalam usaha program imunisasi nasional ini.

JAWAPAN:

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan komorbiditi dan individu yang tinggal atau bekerja di pusat jagaan jangka panjang (*long-term care facilities*).
3. Seperti yang diumumkan oleh YB Menteri Kesihatan pada 19 September 2021, pemberian dos ketiga vaksin COVID- 19 dijangka akan dilaksanakan pada bulan Oktober 2021 kerana imunisasi populasi dewasa sudah mencapai lebih daripada 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah (PBKD) sedang dilaksanakan.
4. **Dos ketiga bermaksud** dos yang diberikan akibat **dari kegagalan sistem tubuh untuk membina perlindungan yang secukupnya selepas menerima vaksin lengkap. Ini boleh berlaku ke atas pesakit yang mempunyai daya tahan tubuh yang lemah (*immunocompromised*), berisiko tinggi** seperti menghadapi penyakit kronik dan lain- lain. **Manakala dos penggalak (*booster*)** bermaksud dos lain yang perlu diberikan kepada seseorang yang sebelumnya mendapat perlindungan yang mencukupi selepas vaksinasi lengkap namun perlindungan **tersebut menurun dari masa ke semasa (*waning immunity*)**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 12 OKTOBER 2021 (SELASA)

SOALAN

TUAN AHMAD FAHMI BIN MOHAMED FADZIL minta **PERDANA MENTERI** menyatakan adakah Kerajaan berhasrat meluluskan undang-undang yang mengehendkan tempoh perkhidmatan seorang Perdana Menteri kepada dua penggal sahaja.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Kerajaan komited dalam melaksanakan Transformasi Parlimen dan Pentadbiran Kerajaan untuk mengembalikan kestabilan politik demi menangani wabak COVID-19 dan memulihkan ekonomi negara. Transformasi kerajaan ini menunjukkan keikhlasan dan kejujuran Kerajaan dengan memaktubkan nilai-nilai murni dan muafakat merentasi pelbagai latar agama, kaum, dan budaya dalam konteks Keluarga Malaysia.

Antara kandungan di dalam Memorandum Persefahaman Transformasi dan Kestabilan Politik termasuklah cadangan bagi untuk menghadkan tempoh jawatan Perdana Menteri kepada 10 tahun sahaja. Memandangkan ia merupakan satu pindaan kepada Perlembagaan Persekutuan, adalah penting satu kajian yang teliti dan menyeluruh perlu dilaksanakan terlebih dahulu sebelum Kerajaan membentangkan cadangan pindaan tersebut di Parlimen.

Kerajaan memberi jaminan bahawa semua yang termaktub di dalam *Confidence and Supply Agreement* (CSA) tersebut akan dilaksanakan dan diambil tindakan segera oleh pihak Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN CHOW KON YEOW [TANJONG]

TARIKH : 12 OKTOBER 2021 [SELASA]

SOALAN

TUAN CHOW KON YEOW [TANJONG] minta **MENTERI ALAM SEKITAR DAN AIR** menyatakan tindakan dan perancangan Kementerian bagi memelihara kawasan tadahan air Ulu Muda. Adakah Lembaga Lembangan Ulu Muda (UMBA) sebagaimana dicadangkan Perbadanan Bekalan Air Pulau Pinang (PBAPP) sebelum ini diluluskan. Jika ya, bila ia akan dilaksanakan dan sekiranya tidak, nyatakan sebabnya.

JAWAPAN

Tuan Yang Di-Pertua,

1. Untuk makluman Ahli Yang Berhormat, cadangan penubuhan Lembaga Lembangan Ulu Muda (*Ulu Muda Basin Authority* – UMBA) sebagai sebuah badan berkanun bebas di bawah Kementerian ini yang bertanggungjawab ke atas pengurusan sumber air bagi tiga Wilayah Ekonomi Koridor Utara (NCER) iaitu Perlis, Kedah dan Pulau Pinang adalah bertentangan dengan peruntukan di dalam Perlembagaan Persekutuan. Ini kerana perkara berkaitan dengan sumber air dan tanah adalah terletak di bawah bidang kuasa kerajaan negeri, selaras dengan Perlembagaan Persekutuan, Jadual Kesembilan, Senarai II – Senarai Negeri. Justeru, melalui cadangan ini Kerajaan Persekutuan dilihat akan melangkaui (*encroaches*) kuasa perundangan kerajaan negeri.

2. Kementerian ini maklum bahawa, berdasarkan Perkara 11 (b), Senarai 1, Perlembagaan Persekutuan, Kerajaan Persekutuan mempunyai kuasa perundangan terhadap *interstate river*. Walau bagaimanapun, melalui peruntukan ini, Kerajaan Persekutuan hanya mempunyai kuasa ke atas sungai yang merentasi sempadan negeri itu sahaja.

3. Cadangan penubuhan UMBA yang dikemukakan oleh Perbadanan Bekalan Air Pulau Pinang (PBAPP) turut mencadangkan pematuhan “Rancangan Lembangan Ulu Muda” yang melibatkan tanah, sumber air dan hutan yang merupakan bidang kuasa perundangan dan eksekutif kerajaan negeri. Dalam hal ini, Kementerian telah membuat semakan terhadap Enakmen Sumber Air Kedah, 2008 dan ia jelas menyatakan bahawa kawasan lembangan sungai adalah termasuk tanah yang berada di sekitar sungai. Enakmen Sumber Air Kedah 2008 juga telah memperuntukkan perkara berkaitan penyediaan rancangan lembangan sungai di negeri itu.

4. Walau bagaimanapun, bagi memelihara kawasan tadahan air Ulu Muda, Kementerian telah melaksanakan pendekatan Pengurusan Lembangan Sungai Bersepadu (*Intergated River Basin Management-IRBM*) di Lembangan Sungai Muda pada tahun 2018. Pelan IRBM ini perlu dijadikan asas oleh Kerajaan Negeri bagi pembangunan guna tanah di Lembangan Sungai Muda bagi mengelakkan berlakunya insiden pencemaran dan memastikan sumber air yang bersih dan mencukupi.

5. Sehubungan dengan itu, adalah wajar kedua-dua negeri iaitu Kerajaan Negeri Pulau Pinang dan Kerajaan Negeri Kedah mengadakan perbincangan bagi mengenal pasti kaedah yang terbaik serta tindakan bersepadu dalam menyelesaikan isu yang telah lama berlanjutan ini. Kementerian ini bersedia untuk menjadi pemudahcara (*moderator*) bagi rundingan di antara kedua-dua Kerajaan Negeri agar kelestarian sumber air dan alam sekitar di Lembangan Sungai Muda terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB TUAN MA'MUN BIN SULAIMAN
[KALABAKAN]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan pelan koordinasi yang dilakukan oleh Jawatankuasa Khas Jaminan Bekalan Akses Vaksin (JKJAV) dalam memastikan pembekalan vaksin CanSino ke Sabah tidak meminggirkan mana-mana kawasan luar bandar, lebih-lebih lagi kawasan Parlimen Kalabakan.

JAWAPAN

Tuan Yang di-Pertua,

Untuk makluman Ahli Yang Berhormat,

Untuk agihan bekalan vaksin COVID-19 sehingga 30 September 2021, negeri Sabah masih diberi keutamaan dengan agihan sebanyak 2.59 juta dos di mana sejumlah 299,000 dos vaksin jenis Cansino (jumlah agihan bulan Ogos hingga 30 September 2021) telah diagihkan sebagai strategi vaksinasi kepada penduduk luar bandar atau pedalaman termasuk bukan warganegara seperti PATI, pelarian UNHCR dan golongan tanpa negara di Sabah.

Agihan ini adalah tertinggi berbanding negeri-negeri lain bagi bulan September 2021. Bagi agihan ke daerah – daerah di seluruh Sabah, ia akan dilaksanakan oleh CITF Negeri melalui program seperti jangkauan luar atau *outreach* termasuk di Parlimen Kalabakan.

Sehingga 30 September 2021, program jangkauan luar (*outreach*) di Sabah telah selesai pemberian dos berjumlah 533,293 dos dengan pecahan dos pertama sebanyak 373,608 dos manakala bagi pemberian dos kedua sebanyak 159,685 dos.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 12 OKTOBER 2021 (SELASA)

SOALAN

Tuan Hassan bin Abdul Karim [Pasir Gudang] minta **MENTERI KESIHATAN** menyatakan adakah Kerajaan bercadang untuk melakukan proses pengagihan kuasa kepada kerajaan-kerajaan negeri dalam Sektor Kesihatan Awam sebagai satu usaha meningkatkan keberkesanan menangani wabak penyakit, misalnya Pandemik COVID-19.

JAWAPAN

Tuan Yang di-Pertua,

1. Sebagaimana yang sedia maklum, Akta Pencegahan dan Pengawalan Penyakit Berjangkit 1988 [Akta 342] telah digunakan bagi maksud mencegah dan mengawal penularan wabak COVID-19 dan lain-lain penyakit berjangkit di Malaysia. Akta 342 adalah suatu Akta yang telah digubal bagi menyatukan undang-undang yang berhubungan dengan pencegahan dan pengawalan penyakit berjangkit.
2. Bagi menangani penularan kejadian pandemik COVID-19 di Malaysia, Kementerian Kesihatan Malaysia (KKM) menggunakan Operasi Pengurusan Bencana sebagaimana yang digariskan melalui Pelan Pengurusan Bencana KKM.

3. Operasi Pengurusan Bencana ini melibatkan pelaporan dan penilaian risiko di peringkat Pejabat Kesihatan Daerah (PKD), Jabatan Kesihatan Negeri (JKN) dan seterusnya di peringkat Ibu Pejabat KKM.
4. PKD dan JKN juga merupakan anggota tetap bagi Jawatankuasa Bencana di peringkat daerah dan negeri. Jawatankuasa ini terdiri daripada pelbagai agensi kerajaan di peringkat daerah / negeri dan bertindak sebagai badan yang penyelarass aktiviti bagi pengurusan bencana di peringkat daerah, dan negeri.
5. Jawatankuasa ini bukanlah satu jawatankuasa yang baru, dan semasa kejadian pandemik COVID-19 ini, KKM telah menggunakan platform jawatankuasa ini bagi menggerakkan aktiviti penyelarasan respon terhadap COVID-19 di peringkat masing-masing.
6. Apabila terjadinya satu bencana dan dalam konteks ini kejadian penularan COVID-19 di sesuatu daerah, Jawatankuasa Bencana ini akan diaktifkan. Wakil KKM di peringkat daerah, iaitu Pegawai Kesihatan Daerah dari Pejabat Kesihatan Daerah (PKD) akan mengemaskini isu berkaitan dan perancangan bagi respon terhadap kejadian pandemik tersebut di peringkat daerah.
7. Pada masa yang sama, PKD juga akan memaklumkan status dan perancangan daerah kepada Jabatan Kesihatan Negeri (JKN) untuk penilaian seterusnya. Di peringkat negeri, JKN juga akan memaklumkan situasi kejadian pandemik di negeri masing-masing kepada Jawatankuasa Bencana di peringkat negeri. Ini adalah untuk memastikan penyelarasan di peringkat negeri dapat dilaksanakan.
8. Begitu juga, JKN akan memaklumkan mengenai situasi pengurusan kejadian pandemik ini kepada *Crisis Preparedness and Response Centre* (CPRC) Kebangsaan, yang merupakan entiti di peringkat Ibu Pejabat KKM bagi penilaian risiko seterusnya.

9. Di peringkat dua (2) jawatankuasa utama, iaitu Jawatankuasa Eksekutif Pengurusan COVID-19 KKM dan Jawatankuasa Eksekutif Teknikal COVID-19 KKM akan mempunyai penilaian serta merancang aktiviti intervensi kesihatan seterusnya. Jawatankuasa ini juga akan memberi maklumbalas yang berkaitan kepada pelbagai peringkat mesyuarat yang selanjutnya, sebagaimana berikut:

- (i) Mesyuarat Jawatankuasa Khas Pengurusan Pandemik yang dipengerusikan oleh YAB Perdana Menteri; dan
- (ii) Mesyuarat Kuartet Menteri COVID-19 yang dipengerusikan oleh YB Menteri Kanan Pertahanan.

10. Adalah dimaklumkan Mesyuarat Jawatankuasa Khas Pengurusan Pandemik juga turut melibatkan kesemua Menteri Besar atau Ketua Menteri bagi memastikan isu-isu yang dibincangkan di peringkat tersebut difahami dengan jelas, bagi membolehkan keselarian dari segi pelaksanaannya di lapangan.

11. Justeru, KKM berpandangan cadangan agar proses pengagihan kuasa diberikan kepada kerajaan-kerajaan negeri dalam Sektor Kesihatan Awam sebagai satu usaha untuk meningkatkan keberkesanan menangani wabak penyakit merupakan suatu pendekatan yang bersifat '*redundant*' terhadap apa yang telah sedia dilaksanakan pada ketika ini.

12. Walau bagaimanapun, Kerajaan Negeri adalah dialu-alukan untuk membantu Kerajaan Persekutuan mengembeling semua sumber Kerajaan Persekutuan dan Kerajaan Negeri untuk mencegah dan mengawal penyakit berjangkit terutamanya COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DATUK SERI DR. MUJAHID BIN YUSOF RAWA [PARIT BUNTAR]

TARIKH : 12 OKTOBER 2021 | SELASA

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **PERDANA MENTERI** menyatakan adakah kos haji terkesan daripada pandemik yang berlaku. Jika ada, jelaskan apa perinciannya.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang Di-Pertua,

1. Kos Haji untuk musim 1440H/2019 bagi jemaah haji Muassasah adalah RM22,900 seorang. Oleh kerana ibadat haji ditangguhkan untuk rakyat Malaysia bagi musim 1441H/2020 dan 1442H/2021 disebabkan pandemik Covid-19, tidak ada sebarang kos haji yang ditetapkan.
2. Lembaga Tabung Haji (**TH**) sedang menyemak dengan terperinci kos-kos menunaikan haji yang terkesan akibat peraturan dan cukai baru yang telah diperkenalkan oleh Kerajaan Arab Saudi. Ini termasuk caj visa haji bermula musim haji 1441H/2020 yang lepas dan kenaikan kadar

cukai tambah nilai (*Value Added Tax*) di Arab Saudi dari 5% kepada 15% bermula bulan Julai 2020.

3. Selain itu, Kos Haji juga dijangka akan meningkat disebabkan kadar inflasi dan perkembangan terkini peraturan haji Arab Saudi, khususnya, yang berkait dengan prosedur operasi standard (SOP) susulan keadaan pandemik Covid-19 yang masih belum reda. Ianya termasuk keperluan ujian PCR dan suntikan vaksin untuk masuk ke negara Arab Saudi serta penjarakan fizikal di dalam bas, bilik penginapan hotel dan khemah-khemah semasa menunaikan haji. Pihak **TH** akan memaklumkan Kos Haji musim 1443H/2022 apabila dimuktamadkan kelak.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
(HULU LANGAT)**

**TARIKH : 12 OKTOBER 2021
(SELASA)**

SOALAN

Minta **MENTERI KANAN PERTAHANAN** menyatakan adakah Kerajaan akan membuat perolehan pesawat *Airborne Early Warning and Control* (AEW&C) memandangkan ruang udara negara kerap diceroboh oleh anasir asing yang telah merendahkan maruah pertahanan udara Malaysia.

JAWAPAN

Tuan Yang di-Pertua,

Tentera Udara Diraja Malaysia (TUDM) masih dalam perancangan untuk membuat perolehan pesawat *Airborne Early Warning and Control* (AEW&C).

Namun daripada segi perolehan aset-aset lain bagi memperkasa usaha mempertahankan ruang udara negara, di bawah RMke-12, Kerajaan merancang melaksanakan perolehan *Maritime Patrol Aircraft* (MPA) bagi menggantikan pesawat Beechcraft yang lebih berkemampuan untuk melaksanakan rondaan maritim dengan lebih menyeluruh dan berkesan. Selain itu, turut diluluskan di bawah RMke-12 ialah perolehan *Fighter Lead In Trainer* (FLIT)/*Light Combat Aircraft* (LCA) untuk tujuan latihan bakal juruterbang pesawat pejuang serta memenuhi keperluan operasi dan latihan juruterbang TUDM.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : PUAN ALICE LAU KIONG YIENG
[LANANG]**

TARIKH : 12 OKTOBER 2021 (SELASA)

SOALAN :

YB Puan Alice Lau Kiong Yieng [Lanang] minta **PERDANA MENTERI** menyatakan :-

- (a) kesan dan impak pelaksanaan Perintah Kawalan Pergerakan (PKP) 1.0, PKP 2.0, PKP 3.0 dan Darurat (selama 7 bulan) yang boleh dianggap telah pun gagal dengan peningkatan kes COVID-19 yang tidak terkawal; dan
- (b) apakah langkah seterusnya untuk mengatasi kesan negatif terhadap ekonomi dan sosial akibat pelaksanaan PKP-PKP dan darurat tersebut.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kerajaan sentiasa mengambil pendekatan mengimbangi antara kepentingan kesihatan rakyat dan kelangsungan ekonomi negara sepanjang tempoh pelaksanaan Perintah Kawalan Pergerakan (PKP) 1.0, PKP 2.0, PKP 3.0 dan juga Darurat. Pelaksanaan PKP dan Darurat yang telah dilaksanakan pihak Kerajaan ini adalah perlu untuk mengawal penularan wabak COVID-19.
3. Pihak Kerajaan telah melaksanakan pakej-pakej rangsangan ekonomi bagi mengimbangi kesan penutupan beberapa sektor semasa pelaksanaan PKP dan Darurat. Melalui pakej-pakej rangsangan ekonomi ini, Kerajaan berjaya mencapai kadar penguncupan Keluaran dalam Negara Kasar (KDNK) yang lebih kecil.
4. Kerajaan juga menyasarkan impak ekonomi seperti yang berlaku semasa suku kedua 2020 tidak akan berulang memandangkan lebih banyak aktiviti ekonomi dibenarkan untuk beroperasi dalam tempoh pelaksanaan Pelan Pemulihan Negara pada kali ini.
5. Dalam hal ini, pernyataan yang mengatakan pelaksanaan PKP dan Darurat telah gagal dengan peningkatan kes COVID-19 yang tidak terkawal adalah kurang tepat. Terdapat kebaikan-kebaikan yang jelas kesan daripada pelaksanaan PKP dan Darurat yang membolehkan Kerajaan melaksanakan tindakan mengukuhkan pengurusan kesihatan awam dengan lebih berkesan.

Tuan Yang di-Pertua.

6. Kerajaan juga telah membenarkan lebih banyak aktiviti ekonomi untuk terus beroperasi, khususnya di lima (5) sektor ekonomi perlu iaitu; pengilangan dan pembuatan, pembinaan, perkhidmatan, perdagangan pengedaran dan perladangan dan komoditi. Langkah ini adalah penting dalam memastikan kelancaran pembekalan keperluan asas harian, perdagangan antarabangsa dan rantai bekalan kepada industri, infrastruktur kritikal dan juga kerja-kerja kecemasan tidak terjejas.
5. Secara keseluruhannya, Kerajaan telah mengumumkan Pelan Pemulihan Negara (PPN) pada 15 Jun 2021 sebagai strategi peralihan keluar dari krisis pandemik COVID-19 secara teratur dan selamat. Di samping itu, Proklamasi Darurat yang berkuatkuasa mulai 11 Januari hingga 1 Ogos 2021 merupakan langkah proaktif yang mesti dilaksanakan bagi membendung dan menguruskan pandemik COVID-19 secara berkesan dan segera.
6. Dengan mengambil pendekatan '*Whole of Nation*', pelan dinamik ini telah dirangka dan akan sentiasa ditambah baik. Kerajaan berharap dengan adanya pelan yang komprehensif dan teratur ini, semua Keluarga Malaysia akan bersama-sama menggembeleng usaha membendung penularan wabak COVID-19 serta memulihkan semula kehidupan rakyat dan sektor ekonomi negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

TARIKH : 12 OKTOBER 2021 (SELASA)

SOALAN

Datuk Seri Shamsul Iskandar @ Yusre bin Mohd Akin [Hang Tuah Jaya] minta **MENTERI ALAM SEKITAR DAN AIR** menyatakan sejauh mana penglibatan Kerajaan di dalam Persidangan Pertubuhan Bangsa-Bangsa Bersatu mengenai perubahan iklim iaitu (COP26) dan apakah agenda utama yang telah disediakan untuk dibawa ke persidangan tersebut.

JAWAPAN

Tuan Yang Di-Pertua,

1. Untuk makluman Ahli Yang Berhormat, Malaysia telah menjadi negara ahli kepada Konvensyen Rangka Kerja Perubahan Iklim Pertubuhan Bangsa-Bangsa Bersatu (UNFCCC) pada 13 Julai 1994. Dalam masa yang sama, Malaysia juga telah meratifikasi Protokol Kyoto di bawah UNFCCC pada 4 September 2002 dan Pindaan Doha kepada Tempoh Komitmen Kedua Protokol Kyoto pada 12 April 2017. Selain itu juga, Malaysia juga telah meratifikasi Perjanjian Paris di bawah UNFCCC pada 16 November 2016.

2. Selaku negara ahli yang komited kepada UNFCCC, Malaysia melalui Kementerian Alam Sekitar dan Air (KASA) selaku kementerian peneraju agenda perubahan iklim negara juga bertanggungjawab ke atas proses rundingan perubahan iklim antarabangsa di bawah konvensyen tersebut. Malaysia telah terlibat di dalam proses rundingan perubahan iklim di bawah UNFCCC sejak dari tahun 1994 sehingga kini. Sempena penganjuran persidangan Persidangan Ke-26 Negara Ahli kepada UNFCCC (UNFCCC COP-26), KASA akan mengetuai delegasi Malaysia ke persidangan tersebut yang akan berlangsung di bandaraya Glasgow, Scotland dari 31 Oktober hingga 12 November 2021.

3. Antara tumpuan utama persidangan UNFCCC COP-26 adalah bagi memuktamadkan isu-isu rundingan perubahan iklim khususnya bagi pelaksanaan Perjanjian Paris bagi tempoh pasca-2021 yang telah tertunggak sejak persidangan UNFCCC COP-25 di Madrid, Sepanyol pada tahun 2019. Antara isu rundingan UNFCCC COP-26 yang akan dirundingkan oleh delegasi Malaysia adalah mekanisme pasaran karbon dan kerangka ketelusan pelaporan perubahan iklim di bawah Perjanjian Paris, adaptasi perubahan iklim serta pembiayaan perubahan iklim. Delegasi Malaysia juga akan memuktamadkan pendirian negara ke atas isu-isu rundingan tersebut sebelum mengangkatnya untuk pertimbangan dan kelulusan Jemaah Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 12 OKTOBER 2021 (SELASA)

SOALAN

TUAN CHA KEE CHIN minta **MENTERI KESIHATAN** menyatakan bilakah dos ketiga suntikan COVID 19 akan dilaksanakan dan bagaimanakah mekanismanya. Apakah ia akan mengguna pakai kaedah pendaftaran melalui Mysejahtera seperti sebelum ini ataupun secara automatik, serta apakah suntikan dos akan diberikan kepada semua rakyat yang bersetuju menerima secara sukarela.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan pemberian dos tambahan akan diberikan kepada kumpulan yang berisiko tinggi terlebih dahulu seperti pemberian dos ketiga vaksin COVID- 19 yang akan dilaksanakan apabila liputan imunisasi populasi dewasa melebihi 80%.
3. Untuk makluman, dos tambahan adalah terdiri daripada dua (2) kategori iaitu:
 - (i) **Dos ketiga:** bertujuan untuk meningkatkan tahap imuniti

dalam kalangan individu berisiko tinggi terhadap jangkitan COVID-19, yang mana dos kedua tidak mencukupi untuk meningkatkan tindak balas imuniti terhadap jangkitan. Penerima dos ketiga ini adalah terdiri daripada pesakit kurang daya tahan imun (*immunocompromised*), anggota barisan hadapan kesihatan yang berisiko tinggi mendapat jangkitan, warga emas dengan komorbiditi dan individu yang tinggal atau bekerja di pusat jagaan jangka panjang (*long-term care facilities*).

- (ii) **Dos penggalak:** atau booster dose diberikan kepada semua individu untuk meningkatkan tahap imuniti yang menurun dalam tempoh tertentu selepas dos lengkap.

4. Anggaran penerima dos ketiga adalah seramai 8.75 juta orang seperti pecahan berikut:

- (i) petugas barisan hadapan yang terlibat seramai 600 ribu orang (petugas kesihatan, keselamatan dan pertahanan);
- (ii) pesakit kurang daya tahan imun (*immunocompromised*) seramai 150 ribu orang;
- (iii) warga emas dan individu yang tinggal atau bekerja di pusat jagaan jangka panjang (*long-term care facilities*) seramai 3 juta orang; dan
- (iv) individu dengan komorbid seramai 5 juta orang.

5. Berikutan itu, satu Garis Panduan berkaitan Pemberian Dos Tambahan sedang dibangunkan dan diselaraskan oleh KKM.

6. Mesyuarat Pihak Berkuasa Kawalan Dadah (PBKD) yang bersidang pada 8 Oktober 2021 yang lalu telah memberi kelulusan bersyarat bagi penggunaan vaksin Cormirnaty keluaran Pfizer sebagai dos penggalak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB DATO' NGEH KOO HAM [BERUAS]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan rancangan Kerajaan untuk memastikan semua orang di Malaysia termasuk pelarian, warga asing yang tidak berdokumen boleh mendapat suntikan vaksin COVID-19.

JAWAPAN

Tuan Yang di-Pertua,

Untuk makluman Ahli Yang Berhormat,

Pelaksanaan Program Imunisasi COVID-19 Kebangsaan menyasarkan 80% daripada populasi dewasa negara selesai divaksinasi dan ia adalah termasuk populasi bukan warganegara yang berada di negara ini. Sehingga 11 Oktober 2021, sebanyak 90.4% daripada populasi dewasa telah selesai divaksinasi.

Bagi pelaksanaan di Pusat Pemberian Vaksin (PPV), MOSTI menerusi CITF telah mengeluarkan Garis Panduan Vaksinasi terhadap Bukan Warganegara. Pada masa ini, pelaksanaan vaksinasi bagi bukan warganegara yang berdaftar dalam sistem MySejahtera masih melalui

penetapan temu janji namun sebagai usaha *mopping up* baki penerima yang masih belum mendapat vaksinasi, program *walk-in* termasuk di kalangan bukan warganegara yang tidak berdokumen telah dilaksanakan di kebanyakan negeri di seluruh Malaysia.

Sehingga 11 Oktober 2021, seramai 2.96 juta penduduk dewasa bukan warganegara di Malaysia telah menerima sekurang-kurangnya satu dos vaksin manakala seramai 2.23 juta penduduk dewasa bukan warganegara telah menerima dos vaksin yang lengkap. Program vaksinasi di kalangan bukan warganegara masih terus berjalan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 12 OKTOBER 2021 (SELASA)

SOALAN

TUAN KHOO POAY TIONG minta **PERDANA MENTERI** menyatakan jumlah keluarga yang berpendapatan kurang daripada Pendapatan Garis Kemiskinan (PGK) di negeri Melaka mengikut pecahan kawasan parlimen.

JAWAPAN

YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)

Tuan Yang di-Pertua,

1. Untuk makluman Ahli-ahli Yang Berhormat, statistik berkaitan dengan pendapatan isi rumah diperoleh melalui Survei Pendapatan Isi Rumah dan Kemudahan Asas (HIS&BA). Survei ini dilaksanakan oleh Jabatan Perangkaan Malaysia sebanyak dua kali bagi setiap lima tahun. Survei yang terkini telah dibuat pada tahun 2019 dan hasil survei ini telah diterbitkan pada 10 Julai 2020. HIS&BA merupakan survei secara pensampelan berkebarangkalian dan maklumat yang tersedia adalah di peringkat negeri, strata (bandar dan luar bandar) dan daerah pentadbiran sahaja.

2. Penetapan isi rumah yang dikategorikan sebagai miskin mutlak, jika pendapatan keseluruhan isi rumahnya berada di bawah paras nilai

Pendapatan Garis Kemiskinan (PGK). Pada tahun 2019, nilai PGK Malaysia telah disemak semula berdasarkan keperluan dan keadaan semasa. Semakan ini menekankan kepada pengambilan makanan yang optimum dan sihat serta keperluan asas bukan makanan yang berkualiti.

3. Berdasarkan metodologi PGK 2019, nilai purata PGK di Melaka ialah RM2,375 sebulan dengan purata saiz isi rumah seramai 3.9 orang. Berdasarkan dapatan HIS&BA 2019, insiden kemiskinan mutlak di Melaka adalah 3.9 peratus iaitu seramai 8.9 ribu isi rumah pada tahun 2019. Dalam tempoh yang sama, insiden kemiskinan mutlak mengikut daerah pentadbiran di Melaka adalah seperti berikut:

- Melaka Tengah mencatatkan insiden kemiskinan mutlak yang tertinggi iaitu 4.2 peratus iaitu seramai 5.8 ribu isi rumah;
- Alor Gajah sebanyak 3.8 peratus (1.9 ribu isi rumah); dan
- Jasin sebanyak 3.0 peratus (1.1 ribu isi rumah).

4. Untuk makluman Ahli Yang Berhormat, DOSM telah melaksanakan satu kajian bagi menilai kesan pandemik ini ke atas pendapatan isi rumah dan kemiskinan bagi tahun 2020.

5. Berdasarkan kajian tersebut, dianggarkan bilangan isi rumah miskin di Melaka meningkat kepada 15.0 ribu isi rumah pada tahun 2020 berbanding 8.9 ribu isi rumah pada tahun 2019. Insiden kemiskinan mutlak telah meningkat daripada 3.9 peratus pada tahun kepada 6.1 peratus pada tahun 2020. Namun, kajian tersebut hanya dilaksanakan di peringkat nasional dan negeri sahaja. Oleh itu, statistik mengikut daerah pentadbiran tidak disediakan.

6. DOSM akan menjalankan Survei Pendapatan Isi Rumah dan Kemudahan Asas (HIS/BA) pada tahun 2022. Analisis dari survei ini dapat dilaksanakan dengan lebih terperinci dan tidak terhad kepada peringkat nasional dan negeri sahaja bahkan sehingga ke peringkat daerah pentadbiran. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
(PERMATANG PAUH)**

TARIKH : 12 OKTOBER 2021 (SELASA)

SOALAN

PUAN NURUL IZZAH BINTI ANWAR [PERMATANG PAUH] minta **PERDANA MENTERI** menyatakan :-

- (a) komitmen Kementerian untuk menyahjenayakan percubaan membunuh diri, memandangkan 147 negara tidak menghukum percubaan membunuh diri; dan
- (b) usaha Kementerian mencegah percubaan ulangan, contohnya melalui perwujudan sistem pendaftaran tertutup individu-individu yang berisiko seperti 'National Self-Harm Registry' yang diguna pakai di Ireland.

JAWAPAN

Tuan Yang di-Pertua,

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

(a) komitmen Kementerian untuk menyahjenayakan percubaan membunuh diri, memandangkan 147 negara tidak menghukum percubaan membunuh diri

Untuk makluman Ahli Yang Berhormat, Kerajaan melalui Jabatan Peguam Negara (AGC) telah mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia kerana berdasarkan statistik setakat 2015 insiden percubaan membunuh diri semakin meningkat dan meliputi pelbagai peringkat umur. Isu percubaan membunuh diri menjadi lebih meruncing pada masa ini kerana keadaan ekonomi yang tidak menentu menjadikan ramai kehilangan sumber pendapatan atau hilang pekerjaan. Oleh yang demikian, pendekatan yang lebih holistik perlu diambil untuk mengekang perbuatan tersebut.

Berdasarkan hasil kajian perbandingan peruntukan undang-undang mengenai percubaan untuk membunuh diri di United Kingdom, New Zealand, India dan Singapura, didapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan. Ini bermakna percubaan membunuh diri bukan lagi suatu kesalahan jenayah di negara-negara tersebut.

Oleh itu, berdasarkan perkembangan undang-undang berkaitan di negara yang dikaji, AGC sedang menimbang cadangan daripada pihak berkepentingan untuk mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh diri ke dalam sistem rawatan kesihatan bagi mendapatkan rawatan yang sewajarnya.

AGC juga sedang meneliti dengan lebih lanjut pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, AGC sedang meneliti keperluan untuk meminda undang-undang lain yang berbangkit daripada pengeluaran kesalahan percubaan membunuh diri daripada sistem jenayah.

(b) usaha Kementerian mencegah percubaan ulangan, contohnya melalui perwujudan sistem pendaftaran tertutup individu-individu yang berisiko seperti 'National Self-Harm Registry' yang diguna pakai di Ireland.

Untuk makluman Ahli Yang Berhormat, keputusan untuk mencegah percubaan ulangan akan diputuskan oleh Kerajaan setelah pihak AGC selesai melaksanakan kajian dan cadangan pindaan undang-undang dibuat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB DATO' MASIR ANAK KUJAT (SRI AMAN)

TARIKH : 12 OKTOBER 2021 (SELASA)

SOALAN

DATO' MASIR ANAK KUJAT [SRI AMAN] minta **MENTERI KERJA RAYA** menyatakan bilakah Jajaran Serian - Sri Aman Projek Lebuhraya Pan Borneo siap. Apakah status pelaksanaan Jajaran tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, jajaran Serian ke Sri Aman bagi Projek Lebuhraya Pan Borneo Sarawak terdiri daripada 2 Pakej Kerja iaitu Pakej Bulatan Serian ke Persimpangan Pantu dan Persimpangan Pantu ke Batang Skrang. Sehingga bulan Ogos 2021, status kemajuan terkini bagi Pakej Pakej Bulatan Serian ke Persimpangan Pantu adalah 92% dengan jangkaan siap pada April 2022 manakala Pakej Persimpangan Pantu ke Batang Skrang adalah 66% dengan jangkaan siap pada September 2022.

Sama seperti projek-projek Kerajaan lain, wabak Covid-19 telah memberi kesan ke atas kemajuan kerja dan kos pembinaan Projek Lebuhraya Pan Borneo Sarawak. Sehubungan itu pelbagai *mitigation plan* sedang dilaksanakan antara lainnyanya penyelarasan semula jadual pembinaan dan Lanjutan Masa (*Extension Of Time* - EOT) bagi memastikan kelancaran dan kelangsungan projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 12 OKTOBER 2021 (SELASA)

SOALAN

Tuan Charles Anthony Santiago [Klang] minta **PERDANA MENTERI** menyatakan bilangan PKS yang gulung tikar dan jumlah pekerja yang terjejas serta kadar kemuflian individu dari Januari 2021 hingga Ogos 2021 berdasarkan sektor ekonomi dan membuat perbandingan statistik mengikut tempoh yang sama pada tahun lepas.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Jumlah kes penggulungan syarikat (terpaksa) mengikut negeri sepanjang Perintah Kawalan Pergerakan (PKP) dari Mac 2020 hingga ke Julai 2021 adalah seperti di **Lampiran 1**. Jumlah keseluruhan kes yang didaftarkan ialah sebanyak **1,246 kes**.

Jumlah kes kebangkrapan mengikut bilangan individu yang muflis serta pecahan mengikut negeri dari Mac 2020 hingga ke Julai 2021 adalah seperti di **Lampiran 2**. Jumlah keseluruhan ialah sebanyak **10,317 kes**. Manakala, jumlah kes kebangkrapan berdasarkan punca kebangkrapan dari Januari 2020 hingga ke Julai 2021 adalah seperti di **Lampiran 3**.

Selanjutnya, Mdl tidak mempunyai rekod berhubung jumlah pekerja yang terjejas sepanjang tempoh PKP tersebut memandangkan Mdl hanya bertindak untuk mengendalikan pentadbiran kes kebangkrapan individu dan pentadbiran kes syarikat yang telah mendapat perintah penggulungan daripada Mahkamah.

Sekian, terima kasih.

LAMPIRAN 1

JUMLAH KES PENGGULUNGAN SYARIKAT (TERPAKSA) YANG DIDAFTARKAN PADA MAC 2020 - JULAI 2021

CAWANGAN	TAHUN 2020										TAHUN 2021							JUMLAH
	Mac	Apr	Mei	Jun	Jul	Ogos	Sept	Okt	Nov	Dis	Jan	Feb	Mac	Apr	Mei	Jun	Julai	
WILAYAH PERSEKUTUAN	41	0	28	22	18	15	15	10	109	38	3	1	24	9	116	27	21	497
SELANGOR	7	0	30	11	29	37	36	10	6	20	26	18	31	1	3	0	8	273
JOHOR BAHRU	2	0	3	12	12	3	5	14	4	5	2	5	3	7	0	0	13	90
PERAK	2	0	0	5	4	4	15	6	2	2	2	1	5	3	2	0	0	53
PULAU PINANG	1	0	3	10	9	8	0	7	5	5	0	0	3	5	4	0	3	63
KEDAH	1	0	0	2	0	0	0	7	7	3	3	2	3	2	0	0	2	32
MUAR	3	0	0	3	1	0	5	0	1	0	0	0	0	0	1	0	0	14
SABAH	3	0	5	3	8	6	2	6	1	0	3	1	4	4	5	1	0	52
KELANTAN	2	0	0	4	0	2	4	2	2	1	1	1	0	0	1	0	0	20
MELAKA	0	0	4	1	1	0	3	5	1	0	0	1	0	1	0	1	1	19
NEGERI SEMBILAN	2	0	0	0	1	0	3	1	3	1	1	0	1	0	1	0	0	14
TEMERLOH	0	0	0	3	0	1	0	0	0	0	0	0	0	0	0	0	0	4
PAHANG	1	0	1	1	1	19	1	1	3	2	0	0	0	0	1	2	6	39
SARAWAK	0	0	0	2	2	1	0	2	0	0	0	0	2	1	0	0	4	14
TERENGGANU	0	0	0	1	4	4	3	4	0	1	0	0	1	1	0	0	0	19
MIRI	0	0	0	2	2	2	1	0	0	0	0	1	0	1	0	0	0	9
SIBU	0	0	0	0	0	0	8	0	0	0	0	0	4	0	0	0	0	12
TAIPING	0	0	0	0	1	1	0	2	0	0	0	0	0	1	0	0	0	5
TAWAU	0	0	0	0	2	0	0	0	0	1	0	0	0	0	0	1	1	5
SANDAKAN	0	1	1	2	1	1	0	0	0	0	0	0	2	0	0	0	0	8
PERLIS	0	0	0	1	1	1	0	0	0	0	0	0	0	1	0	0	0	4
JUMLAH	65	1	75	85	97	105	101	77	144	79	41	31	83	37	134	32	59	1,246

JUMLAH KES KEBANKRAPAN YANG DIDAFTARKAN PADA MAC 2020 - JULAI 2021

CAWANGAN	TAHUN 2020										TAHUN 2021							JUMLAH
	Mac	Apr	Mei	Jun	Jul	Ogos	Sept	Okt	Nov	Dis	Jan	Feb	Mac	Apr	Mei	Jun	Jul	
WILAYAH PERSEKUTUAN	39	0	0	68	84	117	183	108	4	56	20	51	128	103	109	91	127	1,288
SELANGOR	10	0	0	150	267	285	255	174	26	315	96	128	367	378	102	0	2	2,555
JOHOR BAHRU	57	0	7	36	44	0	69	117	62	37	19	40	27	125	97	3	52	792
PERAK	40	0	14	33	63	46	60	81	29	14	33	20	27	112	38	15	3	628
PULAU PINANG	10	0	32	33	21	21	71	35	63	28	32	6	26	44	62	0	4	488
KEDAH	24	0	5	26	47	52	2	61	54	10	30	22	51	38	16	5	34	477
MUAR	15	0	0	24	22	26	45	38	0	32	0	1	24	36	3	0	0	266
SABAH	42	0	6	74	88	87	85	11	0	28	50	52	39	35	25	1	0	623
KELANTAN	12	0	5	2	17	40	61	46	30	34	59	14	46	33	0	0	20	419
MELAKA	32	0	0	9	21	33	51	17	13	9	5	19	30	26	13	5	0	283
NEGERI SEMBILAN	47	0	28	22	26	3	96	48	28	1	9	4	20	57	69	0	23	481
TEMERLOH	9	0	9	16	17	22	27	32	19	20	7	4	20	14	5	0	0	221
PAHANG	21	0	0	19	25	18	11	29	22	9	11	18	35	16	0	0	0	234
SARAWAK	12	0	1	36	39	22	31	27	11	11	11	25	19	22	11	4	6	288
TERENGGANU	21	0	0	6	15	55	54	51	18	31	28	0	35	24	3	0	4	345
MIRI	14	0	5	20	25	13	23	23	13	17	10	10	17	8	8	4	2	212
SIBU	12	0	0	11	19	15	9	12	11	4	4	2	10	7	6	0	1	123
TAIPING	6	0	6	19	26	24	25	18	12	26	6	12	14	2	3	0	0	199
TAWAU	5	0	23	16	34	18	33	0	0	21	13	10	14	0	26	0	0	213
SANDAKAN	8	0	5	18	17	13	25	0	0	2	8	7	7	7	0	1	11	129
PERLIS	2	0	0	3	2	5	6	5	4	6	8	0	4	3	5	0	0	53
JUMLAH	438	0	146	641	919	915	1,222	933	419	711	459	445	960	1,090	601	129	289	10,317

**JUMLAH KES KEBANKRAPAN MENGIKUT PUNCA KEBANKRAPAN
DARI TAHUN 2020 HINGGA JULAI 2021**

KATEGORI KEBANKRAPAN	JUMLAH	
	2020	JAN – JULAI 2021
PINJAMAN PERIBADI	4,457	2,032
SEWABELI KENDERAAN	1,006	416
PINJAMAN PERNIAGAAN	1,223	707
PINJAMAN PERUMAHAN	583	268
HUTANG KAD KREDIT	600	281
KEBERHUTANGAN YANG LAIN	91	52
PENJAMIN KORPORAT	114	65
PENJAMIN SOSIAL	2	0
HUTANG CUKAI PENDAPATAN	158	91
CARUMAN KWSP	105	55
BIASISWA / PINJAMAN PELAJARAN	12	6
JUMLAH	8,351	3,973

Catatan: Bagi kategori “Keberhutangan Lain”, dokumen petisyen yang diserahkan kepada Mdl tidak mengandungi butiran kategori keberhutangan bankrap.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : TUAN AHMAD BIN HASSAN [PAPAR]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan peranan dan bidang tugas Penasihat Khas Hal Ehwal Sosial di Pejabat Menteri, sumbangan beliau dalam menjayakan setiap inci tugas Kementerian termasuk Program Imunisasi Kebangsaan, serta jumlah saraan dan sumber kewangan bagi saraan beliau dan dua penasihat khas yang lain.

JAWAPAN

Tuan Yang di-Pertua,

Untuk makluman Ahli Yang Berhormat,

Status terkini perjawatan di Pejabat YB Menteri Sains, Teknologi dan Inovasi (MOSTI), tiada sebarang lantikan atau penempatan Penasihat Khas Hal Ehwal Sosial sepertimana yang dibangkitkan oleh Yang Berhormat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : DATUK MOHD AZIS BIN JAMMAN
[SEPANGGAR]
TARIKH : 12 OKTOBER 2021

SOALAN :

DATUK MOHD. AZIS BIN JAMMAN [SEPANGGAR] minta **PERDANA MENTERI** menyatakan jumlah projek pembangunan di Sabah yang terjejas akibat pandemik COVID-19 bagi tahun 2020 dan 2021 dan status projek-projek tersebut ketika ini.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Bagi tahun 2020, sebanyak 1,131 program dan projek telah diluluskan di Sabah. Daripada jumlah ini, 60 peratus telah siap dan bakinya telah disambung pada tahun 2021 di pelbagai peringkat pelaksanaan.
2. Bagi tahun 2021 pula, sebanyak 1,097 program dan projek termasuk sambungan dan baharu telah direkodkan. Daripada jumlah ini, sebanyak 30 peratus telah siap dan bakinya masih diteruskan di pelbagai peringkat pelaksanaan.
3. Secara umumnya semua program dan projek sama ada awam atau swasta terkesan dengan pandemik COVID-19. Namun, Kerajaan tetap komited melaksanakan program dan projek di seluruh negara termasuk Sabah dan Sarawak bagi tujuan pembangunan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 12 OKTOBER 2021 (SELASA)

SOALAN

PUAN VIVIAN WONG SHIR YEE minta **MENTERI KESIHATAN** menyatakan dengan kehadiran varian Delta COVID-19:-

- (a) adakah Kerajaan bercadang untuk memperkenalkan suntikan tambahan (*booster shot*) atau suntikan ketiga bagi mereka yang telah diberi vaksin sepenuhnya; dan
- (b) adakah Kerajaan telah memulakan mana-mana perbincangan baharu dengan pembekal vaksin bagi bekalan suntikan tambahan seumpamanya untuk Malaysia.

JAWAPAN

Tuan Yang di-Pertua,

1. YAB Perdana Menteri telah mengumumkan pada 19 September 2021 bahawa kerajaan telah bersetuju untuk melaksanakan pemberian dos ketiga vaksin COVID-19 bagi meningkatkan perlindungan kepada golongan rentan daripada risiko jangkitan COVID-19.
2. Keutamaan akan diberikan kepada kumpulan yang berisiko tinggi terlebih dahulu seperti anggota barisan hadapan kesihatan, pesakit kurang daya tahan imun (*immunocompromised*), warga tua dengan

komorbiditi dan individu yang tinggal atau bekerja di pusat jagaan jangka panjang (*long-term care facilities*).

3. Seperti yang diumumkan oleh YB Menteri Kesihatan pada 19 September 2021, pemberian dos ketiga vaksin COVID- 19 dijangka akan dilaksanakan pada awal bulan Oktober 2021 kerana imunisasi populasi dewasa sudah mencapai lebih daripada 80%. Bagi tujuan tersebut, panel pakar perubatan dan kesihatan sedang membangunkan garis panduan pelaksanaan pemberian dos ketiga dan pada yang sama permohonan untuk mendapatkan kelulusan Pihak Berkuasa Kawalan Dadah (PBKD) sedang dilaksanakan.

4. **Dos ketiga bermaksud** dos yang diberikan akibat **dari kegagalan sistem tubuh untuk membina perlindungan yang secukupnya selepas menerima vaksin lengkap. Ini boleh berlaku ke atas pesakit yang mempunyai daya tahan tubuh yang lemah (*immunocompromised*), berisiko tinggi** seperti menghadapi penyakit kronik dan lain- lain. **Manakala dos penggalak (*booster*)** bermaksud dos lain yang perlu diberikan kepada seseorang yang sebelumnya mendapat perlindungan yang mencukupi selepas vaksinasi lengkap namun perlindungan **tersebut menurun dari masa ke semasa (*waning immunity*)**.

5. Kementerian Kesihatan sedang dalam proses untuk memuktamadkan keperluan perolehan tambahan untuk kegunaan suntikan tambahan (*booster dose*) sebelum mengadakan perbincangan lanjut dengan syarikat-syarikat pembekal vaksin yang telah diluluskan pendaftaran vaksin dos penggalak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB TUAN CHAN FOONG HIN
[KOTA KINABALU]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan sama ada Kerajaan bersetuju dengan cadangan bekas Menteri Abdul Rahman Dahlan yang mencadangkan agar pendatang asing tanpa izin (PATI) divaksinasi dahulu sebelum diusir keluar dari negara? Apakah strategi penvaksinan untuk PATI tanpa apa-apa dokumen sah di Sabah dan seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat,

Pelaksanaan Program Imunisasi COVID-19 Kebangsaan menyasarkan 80% daripada populasi dewasa negara yang mana termasuklah populasi bukan warganegara yang menetap di negara ini.

Bagi pelaksanaan di Pusat Pemberian Vaksin (PPV), MOSTI menerusi CITF telah mengeluarkan Garis Panduan Vaksinasi terhadap Bukan Warganegara. Pada masa ini, pelaksanaan vaksinasi bagi bukan warganegara yang berdaftar dalam sistem MySejahtera masih melalui

penetapan temu janji namun usaha *mopping up* baki penerima yang masih belum mendapat vaksinasi, program *walk-in* termasuk di kalangan bukan warganegara yang tidak berdokumen telah dilaksanakan di kebanyakan negeri di seluruh Malaysia.

Sehingga 11 Oktober 2021, seramai 2.96 juta penduduk dewasa bukan warganegara di Malaysia telah menerima sekurang-kurangnya satu dos vaksin manakala seramai 2.23 juta penduduk dewasa bukan warganegara telah menerima dos vaksin yang lengkap.

Daripada jumlah bukan warganegara ini, seramai 556,897 penduduk dewasa di Sabah telah menerima sekurang-kurangnya satu dos vaksin manakala seramai 306,593 penduduk dewasa di Sabah telah lengkap dos.

Mengenai vaksinasi terhadap Pendatang Asing Tanpa Izin (PATI) supaya divaksinasi dahulu sebelum diusir keluar negara, Kerajaan melalui Kementerian Kesihatan sedang dan masih melaksanakan program vaksinasi kepada banduan dan tahanan depoh imigresen bersama Kementerian Dalam Negeri (KDN).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN
DARIPADA : YB PUAN NOORITA BINTI SUAL [TENOM]
TARIKH : 12 OKTOBER 2021 (SELASA)

SOALAN

Minta **MENTERI SAINS, TEKNOLOGI DAN INOVASI** menyatakan perkembangan terbaru pemberian vaksin negeri Sabah dan nyatakan daripada jumlah penerima vaksin berapakah penerima vaksin yang bukan warganegara dan yang tidak mempunyai dokumen perjalanan yang sah dan apakah inisiatif Kementerian untuk mengelakkan kepadatan penerima vaksin secara 'walk in' di pusat PPV di Sabah seperti yang ditularkan baru-baru ini.

JAWAPAN

Tuan Yang di-Pertua,
Untuk makluman Ahli Yang Berhormat,

Sehingga 11 Oktober 2021, pelaksanaan vaksinasi di Sabah mencapai 73.5% populasi dewasa menerima sekurang-kurangnya satu dos vaksin manakala 65.6% populasi dewasa telah lengkap dos vaksin.

Bagi vaksinasi bukan warganegara di Sabah, sehingga 11 Oktober 2021, seramai 556,897 orang dewasa di Sabah telah menerima sekurang-kurangnya satu dos manakala seramai 306,593 orang dewasa di Sabah telah lengkap dos.

Bagi menjawab persoalan mengenai pelan kontigensi bagi mengawal isu kesesakan di Pusat Pemberian Vaksin (PPV) yang mana MOSTI sedar dan akui bahawa perkara ini pernah terjadi di Sabah.

Untuk itu, apabila CITF mengesan kesesakan luar biasa berlaku di sesebuah PPV, siasatan akan dilaksanakan dengan serta merta bagi mengenal pasti punca dan perkara ini akan diselesaikan pada kadar segera. Antara tindakan yang dilaksanakan termasuklah memastikan penerima vaksin tidak hadir terlalu awal secara beramai-ramai atau dalam kumpulan yang besar.

Sekiranya sesebuah PPV mempunyai limitasi ruang yang terhad, maka lokasi baharu akan dikenal pasti dan pengoperasiannya akan dipindahkan ke lokasi yang lebih luas pada kadar segera. Selain itu, bilangan petugas akan ditambah bagi membantu pengawalseliaan pergerakan penerima vaksin di lokasi tersebut dan memastikan bekalan vaksin mencukupi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 12 OKTOBER 2021 (SELASA)

SOALAN:

DATUK IGNATIUS DARELL LEIKING minta **MENTERI KESIHATAN** menyatakan laporan terperinci yang terkini mengikut negeri status perbelanjaan Program Imunisasi COVID-19 yang bernilai RM5 bilion.

JAWAPAN

Tuan Yang di-Pertua,

1. Kerajaan telah menyediakan peruntukan berjumlah **RM4.80 billion** kepada Kementerian Kesihatan Malaysia (KKM) bagi perolehan vaksin dan logistik vaksin COVID-19 dan lain-lain perbelanjaan di bawah Program Imunisasi COVID-19 Kebangsaan (PICK).
2. Sebanyak **RM3.9 billion** adalah bagi tujuan perolehan vaksin dan logistik vaksin manakala **RM900 juta** adalah bagi lain-lain perkara berkaitan PICK seperti bekalan pakai habis termasuk **Consumables dan Diluen** yang berjumlah **RM175 juta**. Ini termasuk keperluan perolehan *Low Dead Volume (LDV) Syringe and/or Needle* bagi memastikan penggunaan dos yang optima serta mengelakkan pembaziran dos bagi administrasi *multiple dose vial* vaksin COVID-19.
3. Selain itu, bagi mempercepatkan pelaksanaan PICK, Kementerian turut menggunakan peruntukan tersebut untuk **Penyumberluaran Program Imunisasi** melibatkan pengamal perubatan swasta, badan bukan kerajaan (NGO) kesihatan dan syarikat swasta berkaitan kesihatan yang diselaraskan oleh ProtectHealth Corporation Sdn. Bhd. berjumlah **RM310 juta** serta pembayaran saguhati kepada sukarelawan kesihatan di Pusat Pemberian Vaksin (PPV), Pusat Penilaian COVID-19 (CAC) dan Pusat Kuarantin dan Rawatan COVID-19 Berisiko Rendah (PKRC) serta lain-lain fasiliti berjumlah **RM227 juta**.
4. Sehingga **15 September 2021**, KKM telah membelanjakan sebanyak **RM3.16 billion** atau bersamaan **66%** bagi perolehan vaksin dan logistik vaksin. Keseluruhan perbelanjaan bagi pelaksanaan PICK pula adalah berjumlah **RM3.49 billion** atau bersamaan **73%**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN LIM GUAN ENG
[BAGAN]**

TARIKH : 12 OKTOBER 2021 (SELASA)

SOALAN :

YB Tuan Lim Guan Eng [Bagan] minta **PERDANA MENTERI** menyatakan bilakah ekonomi dan sekolah akan dibuka semula, jumlah vaksin yang dibeli dan tarikh penghantaran serta bilakan vaksinasi untuk golongan yang berumur di bawah 18 tahun. Sejauh manakah pekerja asing yang sah dan tanpa izin telah di vaksinasi.

JAWAPAN

**YB DATUK DR. ABDUL LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. **Sektor ekonomi telah pun dibuka secara beransur-ansur** di bawah Pelan Pemulihan Negara (PPN) dan Kerajaan telah memperkenalkan kemudahan-kemudahan di dalam sektor ekonomi dan sosial bagi individu yang telah menerima vaksinasi lengkap. Antara kemudahan yang telah diberikan adalah seperti Gelembung Pelancongan Domestik (*Domestic Travel Bubble*), aktiviti *dine-in* dan pengoperasian fasiliti sukan dan rekreasi *indoor*.

2. Berkaitan **pembukaan sektor pendidikan**, pengumuman telah dibuat bahawa sesi persekolahan secara bersemuka adalah mulai 3 Oktober 2021 mengikut fasa dalam PPN dan menggunakan kaedah penggiliran murid secara mingguan. Dalam hal ini, Kementerian Pendidikan Malaysia telah merangka satu pelan komprehensif pembukaan semula sekolah bagi memastikan murid dapat kembali belajar secara bersemuka di sekolah dalam keadaan selamat.

3. Sehingga kini, sebanyak **87.9 juta dos vaksin telah ditempah** oleh Kementerian Kesihatan Malaysia (KKM) melalui Fasiliti COVAX dan secara rundingan terus dengan beberapa pengeluar vaksin COVID. Perkara ini melibatkan **implikasi kewangan sebanyak RM 4.64 billion meliputi kos vaksin dan logistik vaksin.**

4. **Program Imunisasi COVID-19 Kebangsaan Remaja (PICK-Remaja)** telah bermula pada 8 September 2021 dengan menyasarkan seramai 3.2 juta remaja berumur 12 hingga 17 tahun. Negeri Sarawak dan Wilayah Persekutuan Labuan merupakan negeri terawal program PICK-Remaja ini dilaksanakan diikuti negeri-negeri lain pada 15 September 2021. Keutamaan diberikan kepada remaja berumur 16 dan 17 tahun dan seterusnya akan diperluaskan kepada remaja berumur 12 hingga 15 tahun.

5. **Berdasarkan statistik pemberian vaksin COVID-19** (6 Oktober 2021) kepada **bukan warganegara**, seramai 2.9 juta orang telah menerima sekurang-kurangnya satu dos vaksin manakala 2.1 juta orang telah menerima dos lengkap. Data penerima vaksin bukan warganegara ini juga **merangkumi pelaksanaan vaksinasi kepada pekerja di bawah Pusat Pemberian Vaksin (PPV) Industri** termasuk pekerja asing. Sehingga tempoh yang sama, seramai 1,004,798 pekerja telah menerima dos pertama vaksin dan 946,256 menerima dos kedua vaksin melalui PPV Industri.

Sekian, terima kasih.